





曾文正公書札卷六

與羅伯宜

攻城最忌蠻攻兵法曰將不勝其忿而蟻附之殺士卒三分之一而城不拔者此攻之罪也故僕屢次寄書以蠻攻爲戒凡狡悍老賊與外強中怯之新賊無難辨別足下從征有年於該逆技倆當亦能測其淺深耳地道若成轟陷時宜以千人集缺口搶登其餘各營伺各堞守陣疎懈之處先登借缺口以驚亂賊心而非專恃缺口以成功也

與羅伯宜

建昌兵勇雲集

無位望較崇者爲之統帥特恐意見各歧互相

書札卷六

責讓則難望成功此刻人皆望聞兵之至吾則反恐聞兵之至益兵愈多則人愈雜議論愈紛米糧小菜愈難接濟惟冀足下與九峯嚴戢本管六營之士卒不許有一人閒言閒語稍觸別營六琴太守則不特宜戢本管六營兼宜小心和協別營之將領兵猶火也勿戢將自焚也望夜夜傳集營官哨官講明白治之要和眾之道吾六營旣戒浪戰則別營必有深譏爲畏憚者亦宜每夜先與各哨勇說明聽人譏議而已建昌若必不得手則六營者將來仍至撫州會剿或於崇宜等處扼要駐紮使瑞臨之援賊不得至撫亦所以斃撫賊也

與羅伯宜



數日不接來書心甚懸系虎營人來言攻城仍未得手身地道之法貴在火藥飽足緊封閉固使其力猛而氣無所洩故能轟陷十丈八丈之遠若氣洩則仍轟出隧外於城牆無涉氣固而力不甚猛則僅能掣裂不能崩陷二者皆定理也此閒水陸兩次僅解去藥二千斤且硝多磺少決不敷用日內趕配磺多之藥計解到在十天以外此軍抵建彌月恐士氣垂垂老矣閩兵三千究竟可用否張從龍膽識如何現奉諭旨飭赴金陵向營想廉學使已有文到建頃聞金陵局勢已有轉機吉中丞所失之九華山營盤業被張國樑奪回如閩省兵將果甚得力僕尚欲奏明畱於江省調遣也六營兵勇果有紀律否得勝歌中之語能行得十分之一二否口糧僅發百文羣有缺望否聞建郡各屬尚可勸捐若捐至數千金加發各勇夫口糧以補省發之不足能每日再加一百則每月僅欠二千四百文將來之彌補較少目下之呼應較靈果有可加則請作爲六琴太守之私惠初政能施恩惠後日用法而人不怨辦理自易得手也

### 與李次青

閩兵之來建昌者頃奉諭旨調赴金陵大營該軍未與此賊周旋原難必其得力惟業已來此乃不能不惜其去鎮江逆賊連撲高資九華山二大營吉中丞殉難蘇杭震動向帥寄何根雲中丞信茲抄呈一覽近日又得玉山探報張國樑帶兵四千



已將九華山營盤奪回或彼中已有轉機此項閩兵仍當奏留  
江省牽制建昌之賊俾羅彭六營得以移調他往也

與羅伯宜

饒州既失江省大局益壞爲今之計西則貴有大軍駐紮瑞州  
等處迎接兩湖之援師東則貴有大軍駐紮安仁等處保全廣  
信之要郡江西一綫生機惟在廣信河口茶餉鹽餉捐務釐務  
月可得二三萬金現飭畢林兩營二千人進勦冀復饒郡而保  
信州如饒不能克則須於安仁屯一大軍屏蔽撫饒通信之路  
而接水師通省之路其西勦一軍亦必不可少賊之精銳悉萃  
西路不以一軍迎之則袁萬援師終無來會之期此大局之宜  
審者也足下率六營者在撫專以斷援賊接濟爲主不必乘梯  
登城深溝高壘自治嚴明以待援賊之至而痛殲焉畢都司整  
輯新軍尙屬可觀得勝軍僅亡四十人餘俱無恙

與彭九峯

書札卷六

三

西路久沒於賊謠言宏大裹脅眾多其實江西本地被賊擄掠  
者及甘心前驅者皆不能戰萬載官兵百戰百勝非盡官兵之  
強也實江西從逆之民之不能打仗耳卽廣東新附之匪自茶  
陵州而來者其打仗亦有頭陣而無後勁蓋無人不吸食鴉片  
與之鏖戰稍久則煙癮發而不能打矣若能用羅山之法我軍  
人人箕踞如登廁者之狀與之相持一時之久則萬無不勝之



理我官軍須明白此兩層一層江西百姓全不能戰見人抄尾則立敗一層廣東新匪不能久戰與之久持則必敗日日與各營哨說此兩層庶謠言不足動其心而一二仗後必深信吾言之不謬也如畢金科林葆及此次足下等所領六將皆能戰之將亦識迴合之法特初交仗時不能按耐以致先者衝鋒後者隊伍不齊此後須嚴戒之此次省軍之進本以打奉新爲正辦吾恐軍心不甚穩固故令先與援軍會合至先由奉新一路行走兵事喜詐而惡直也將官中或有議其不應迂道二十里者應嚴飭而婉諭之瑞州太守王嘉麟解銀六千至瑞以犒援軍將追及與貴軍同行好爲照應可也

與李次青

書札卷六

四

常山之浙兵防守浙境並非爲援兵而來也自今歲以來廉學使奏請閩浙粵三省援兵者二次奏請閩督粵督來江總辦軍務或另簡大員來江者一次咨請閩督來江勦賊者一次咨調常山浙兵來援者數次僕與中丞會奏粵兵來保贛州下攻吉安者二次奏撥上海關稅銀者二次奏請於上海抽釐者一次咨催浙兵來援者二次其究也無一事辦得到僅有閩兵已抵建昌差強人意然謂其大有裨益則未也現在浙兵已奏明不能來援崑壽之師又奉 特旨令航海往援金陵矣江西局勢日蹙僕在此調兵籌餉艱難委曲有非筆墨所能罄者徹宵與



曠束手無策然賊勢亦實散漫瑞州初一初四之戰眾在二萬以外旗旂色雜不純用黃布多綢少物力已屈軍械不整當其接戰之時後者徒知搖旂吶喊虛聲喝迨前隊旣敗則狂奔大潰傾山倒海又廣東新附之賊實與真長髮不合看此豈可以長久者吾輩若更堅忍數月似當有豁然貫通之一日僕自去年以來屢書勸諷足下貴精不貴多積小以高大戒維莠之桀桀法桃李之不言當茲艱貞之際尤不能不進此迂拙之言也

### 與彭九峯

瑞軍尙無移大坵之信貴軍想不能不赴瑞會合矣大坵不知

書札卷六

五

果好駐營否如不可駐須另擇一處但求橫梗於中使瑞奉兩處之賊不通耳我能立一老營如該逆梅家洲小池口之例深溝高壘爲堅不可拔之計合貴軍與瑞軍萬人者分兩爲二以半駐老營憑壘而守之以半出征伺瑕而擊之此半出則彼半休彼半出則此半休我常爲主賊常爲客或尙有困賊之一日若不早定大計以萬人而頓於堅城之下設石逆復自鄂省來援則士氣恐漸就衰竭益不可用也足下與瑞軍會合後卽力持此議擇要移駐老營一定僕卽日前往與舍弟及吳普劉君子相見並勞諸軍士幸無游移不決官軍向不講守壘之法足下須日日與眾將講求至要至要



前接次青來函具悉不願移營之意頃彌之回省具述營中情事僕之欲移營河外七里岡者恐師老力疲不宜逼近城根朝夕防維或有疎懈移紮十里以外如去年蘇官渡故事我軍得以少資休息不過牽制賊黨不得竄逸東進安餘等縣而已若是則雖分撥出鳳岳寶志四營而尚存六千猶嫌其多也次青之意仍欲照前圍攻力謀克復則縱不撥出四營猶嫌其少也大計既劃然兩途小處亦決難相合徒爲牽制之謀則七里岡儘足自立若爲攻克之策則豈特四營者不宜撤彌之亦不宜歸彌之既歸而猶不急併江楚之軍不將各營移聚一處鄙人竊爲懸懸不置也四營者既斷不肖分撥他往卽當如所請姑准暫畱惟久頓堅城之下士氣日損宜思所以抽掣之法善退之道軍事以氣爲主湍去舊氣乃能重生新氣若不改頭換面長守此堅壁以日夜嚴防而不得少息則積而爲陳腐之氣如敗血之不足以養身也望兩君子精心維持於十里之外求一善地相機而退紮一步養息此氣今日之善退正以爲他日善進之地君子之道一龍一蛇豈拘於一格哉

與悍賊相持晝夜嚴防實非易易貴軍自至撫以來大小數十戰屢挫凶鋒保全東路半壁爲功不小已有函准令保舉出力



各弁此次雖小有挫折想大軍尚足自立也尚望激厲將士始終不懈聞耿李二君足爲羣英領袖應如何破格優獎由足下酌量稟商唐得陞陳大力戴榮貴郭毓龍郭式源等卽日催赴撫營六月餉項亦卽日起解望閣下堅持定力不動不搖疾風暴雨終朝卽止危棋急劫須臾乃定四十里街之賊本日聞已退去郭守謙等之廣義軍或可調至撫郡閣下亦宜營孟營薛中之窟築孫氏濡須之塢早規善計以立不拔之基至囑至幸

### 與彭九峯

僕札飭移營蓋有鄙意三端一則頓兵堅城賊常主而我常客是僕所深惡者也一則自省至瑞恐中間屯賊梗塞使我文報

與書札卷六

七

餉道不通也一則僕親至營盤犒勞與各營綢繆數日而後可分爲兩支調遣也今峙衡之意欲於北路離城十餘里駐紮甚好甚穩請卽日與各營定計行之惟於僕之意第一層已相合矣第二層三層尚未能悉合將來仍須熟籌目下城北紮營不可用四面受敵之地至要至囑

### 與彭九峯

接峙衡信謂日內將開大仗少遲數日再行移營等語軍情難以遙斷應遲移應速移聽峙衡與足下相機行之可也但究須移開不宜久頓堅城之下賊常主而我常客耳吳竹莊帶彪勇並義武營馳勦新昌甚好甚好有重兵以鎮守有輕兵以鵬勦



正合古人奇正互用之法但竹莊一軍未歸之前瑞州大營暫只宜移於北路十餘里以便與竹軍通消息此又隨時之變在軍中者所當斟酌也

### 與彭九峯羅伯宜

各營出隊均不慌忙亦無輕進輕退之弊甚欣甚慰若常守此規模則日上蒸蒸日上可百戰百勝聞濠溝尚不甚寬深乞飭各營日夜開挖吾之法卽以壕內之土加諸牆上故濠深一寸牆卽高一寸各營官不守我法分壕與牆爲二事濠內之土無所歸又於濠外添一斜坡最易誤事然較之濠溝太淺者究勝一籌也

### 與羅伯宜

書札卷六

八

初四大仗之後初五初六峙衡連日出隊不甚相宜蓋瑞州一軍所恃者在湘寶兩營到瑞數大戰以來受傷者亦頗不少似此精銳百戰之卒當加意愛惜之宜使賊來尋我我不去尋賊僕於用兵深以主客二字爲重撲營則以營盤爲主撲者爲客野戰則以先至戰地者爲主後至戰地者爲客臨陣則以先吶喊放鎗者爲客後吶喊放鎗者爲主前廿五日有信與峙衡囑其移營暢言主客之義今兩次大勝之後正可趁此時移營久頓城下賊常主而我常客不過兩月銳氣暗損懈心暗生強兵將變爲疲兵望與峙衡切商卽日移營至要至要賊雖屢敗而



城中精銳老賊並未多損切不可稍存輕敵之見千萬千萬

### 與李次青

接來書足下自請進剿頓兵堅城鬱鬱不得一當非特足下焦悶僕亦慮之久矣惟撫州江楚二軍當積疲之後傷病之眾合之則尚可支持分之則難於獨立且多撥數營征剿河口則居守撫州者患其單多撥以居守撫州則征剿河口者虞其弱若全數調以東征置撫州於不顧則所患者不在直撲省垣不在竄擾東進安餘而在南昌豐城二縣目下收漕收捐正在暢王之際驟撤撫圍則零匪四出鄉民觀望漕捐並沮而建昌當此兵疲餉乏之後亦深恐撫賊之逸出來攻有此二者是以不敢

書札卷六

九

全撤撫圍然而河口颺忽之賊不能不思撲滅撫州久鈍之師不能不思掣動此間方集議妥善之策而拔營之難亦非倉卒所能了辦一則發餉須略寬裕乃能裹糧啟行二則貴軍傷病各缺須於未拔營之前挑補完全三則營中大礮及各累重之物須先行搬運回省尊處請於數日料理諸務此間定議後卽專札送撫亦欲接足下報我去函再定也

江楚二軍平江勇必須合而爲一五岳一營現已札飭以一哨補足五營營餘四哨分補傷病各額龔岐皋在前營踽踽涼涼心常依戀足下今飭其歸依左右合計尙得六千人若加意訓練終屬勁旅葢平江勇之長處有二賭博鴉片之積習不深一



也多勁健能戰之士二也其短處有一不知上下之分難於約束是也存其長而懲其短在足下之一心一手非他人所能爲力矣

### 與劉峙衡

接胡潤芝中丞來信知僞翼王石達開往援武昌大爲李迪葺所敗聞我軍先期修壘濠寬深各二丈該逆來撲我軍堅忍不出待其氣盡力乏彼竭我盈然後出而大戰屢次以此法致勝石逆口內必來瑞州救援尊處亦當以此法禦之寶勇出隊太早宜切戒之彪勇宜速調回瑞兵勇與長夫皆宜修濠日夜興工不可少停濠中之土宜覆於牆上不可覆於外濠宜壁立斗絕不可斜陂阨下石逆在武昌所以致敗之法宜與各營官詳細言之曰內城中之賊若出撲我營我軍宜堅守不戰蓄養銳氣以待巨寇之至

### 與羅伯宜

時衡招勇僕囑其緩三月再辦僕於峙衡欲其先精而後大先鬱而後暢往年余愛敬塔羅二公逢人輒稱頌其智勇雖聲名布滿天下而究惜大功未竟至今頗用悔謙足下愛敬峙衡當代爲蘊之蓄之不必逢人頌揚使其實常浮於名則所以愛之者更大也

### 與羅伯宜



此時已聞石逆之警營盤不宜移紮就現在之營日夜浚濠以寬深二丈爲度日內專以蓄養銳氣爲主城中之賊出而搦戰我軍善刀而藏堅壁不戰石逆初來我軍亦宜用此法該逆前月過興國時所帶盡裹脅之人軍械亦不齊備陳方家信決其必敗果爲迪庵所摧蓋此賊亦誇大而不精矣我軍以精整勝之可也

### 與羅伯宜

省中各營官多有用之材頡頏作氣勢不肯下人亦將領之常態足下當剴切勸導峙衡之短處在所見聞偏其長處在雖偏而不私峙衡之令人怨處在好當面罵人其令人感處在好救

### 書札卷六

十一

人之危急此僕詢之中後營各勇而知非僅聞之舍弟與足下也足下將此數端一一婉告省中諸將略其短而服其長自然互相敬愛矣

### 與劉峙衡羅伯宜

接廿六夕手書具悉是日大戰獲勝吾意欲屢次堅壁不出以驕賊氣不知果可行否伯宜不特爲省營所親附並爲援軍所敬信若貴恙已愈自應畱瑞以維繫人心待僕至瑞之日給假回楚一行可也峙衡添營之意甚誠吾不忍拂惟自河口失陷廣信被圍以來江西一勺活水忽爾遏絕此後餉項全無來源是以再三躊躇未敢慨然允許石逆東來毫無信息或仍畱鄂



中或竟下金陵亦未可知此閒局勢稍紓彪勇尚可鵬勦數處再行回瑞九舍弟與周梧岡在省各招千五百人月初當可起行來江屆時峙衡或與九弟同爲一枝出勦各路瑞州老營卽交梧岡轄之亦均不嫌其單薄也

### 與李次青

自聞足下抵崇仁之信風雨淒淒泥濘難行別增一種焦灼五爵營萬一來省當令其速赴豐城聞李晉發業已到省待其來謁我軍新挫之後不知足禦之否如自揆軍心未固眾志難恃則不如退保豐城與仰素相依猶足以自固而徐圖振起昔者靖港之役不才栖遲高峯寺兩月有餘在莒之辱刻不敢忘今日亦望足下少忍靖港之辱以謀澠池之奮無過激憤以養不訾之軀而成不世之才內慰高堂外慰知心至要至要無忽無忽

### 與羅伯宜

初一日接惠書具悉種種日中則昃月盈則虧故古詩花未全開月未圓之句君子以爲知道自僕行軍以來每介疑勝疑敗之際戰兢恐懼上下怵惕者其後常得大勝或當志得意滿之候各路雲集狃於屢勝將卒矜慢其後常有意外之失瑞州一軍自初一初四大捷各營漸有輕敵之態頃聞黃澤遠添營已至王吉昌虎勇亦來周梧岡及舍九弟亦將畢集於此鄙懷惴



惴輒有鑒於九江小池口往轍或致意外之失聞時衡思深慮遠乞足下與之精心默究在己有少滿足之懷則箴砭之將士有矜慢之漸則戒飭之關係至大千萬千萬

與李次青

二月十一日酉刻接到家信慘悉家嚴於初四日巳刻棄養自正月廿六日中痰僅病七日遽遭大故皆不孝罪孽深重延致此禍行止大局現尚未定日內再當專使奉告年來相從最久者惟閣下嘗盡千辛萬苦不堪回首一一細思也六舍弟當於二日內奔喪旋里先此奉聞

與李次青

大書札卷六

五

國藩因大故而去營惟於足下處深自負疚刻刻不忘務祈善自保重如瑞州克復則普吳二君中得一人與足下輔車相依可稍慰也

與李次青

前於聞訃後布達一函定邀矜照國藩痛嬰斯酷哀楚難勝計自謬逐朝行二十年來未伸一日之養昔歲母喪未得終制今茲父喪莫親含殮於軍國爲贅疣於家庭爲罪人現已馳報奏請奔喪回籍守制仍雙請赴營効力定於二十日匍匐就道恨不得星飛抵里撫棺一痛一切情形附具摺稿一紙並抄移將軍中丞原咨一件敬呈尊覽亦可得其大略惟足下係因國藩



而出辛苦磨折誓不相棄今國藩迫於大故不克相依共命實深愧負撫州各戰尚未保舉并負麾下士卒臨風無任歉仄統惟心鑒

### 與李次青

閏五月初三日專丁至接五月十五日惠械敬悉一切藉承興居佳暢勳望日崇至以爲慰國藩抵里倏及三月頃於近宅七八里覓得葬地一區閏五月初三日發引計十五六日可以負土成阡江右軍事刻不去懷目下瑞潯臨吉皆駐勁旅所難者不在籌兵而在籌餉以兵事言之則得將軍中丞二人固可妥商調遣而綽有餘裕以餉事言之則理財本非鄙人所長而錢

### 書札卷六

西

漕勸捐抽釐等事又屬地方官之專政將越俎而代謀動猜疑之叢生卽足下去年之枵腹從事自捐自養而其不見亮於人者亦已多矣至口食不繼謂以國藩相處較久之故欲以甘言撫慰眾心尤屬可慙而不可常反復思維縱使迅速赴軍實不能有所裨於軍國之萬一而兩次奪情得罪名教乃有孝子慈孫百世莫解之誓前此博詢眾議求衷至是近得各處復書如吳南屏馮展雲輩皆謂宜奏請終制頃於五月二十二日具摺陳請鈔稿敬呈仁覽二十一可奉 硃批屆期再當布聞自維卽戎數載寸效莫展才實限之命實尸之卽亦無所愧恨所愧恨者上無以報 聖主優容器使之恩下無以答諸君子患難



相從之義常念足下與雪芹鄙人皆有三不忘焉雪芹當岳州  
敗時正棹孤舟搜勦西湖後由龍陽沅江偷渡沈船埋礮潛身  
來歸一不忘也五年春初大風壞舟率破船數十號挈涓滴之  
餉項渙散之人心上援武漢二不忘也冬間直穿賊中芒屨徒  
步千里赴援三不忘也足下當靖港敗後宛轉護持入則歡愉  
相對出則雪涕鳴憤一不忘也九江敗後特立一軍初志專在  
護衛水師保全根本二不忘也樟鎮敗後鄙人部下別無陸軍  
賴台端支持東路隱然巨鎮力撐絕續之交以待楚援之至三  
不忘也生也有涯知也無涯此六不忘者鄙人蓋有無涯之感  
不隨有生以俱盡自讀禮家居回首往事睠睠於辛苦久從之

書札卷六

五

將士尤睠睠於足下與雪芹二人龍方伯血性男子當能青睠  
相加耆中丞新政昭融一改前此舊習意者貴軍有先否後喜  
之日保舉之案必不待鄙人之至而後出奏惟餉項支絀協款  
日窮則同一束手耳霞仙來此會葬因其太公慟念少子不克  
應耆中丞之聘雲仙枉弔聚晤數日比聞其將赴京供職潤公  
時有書來才氣宏放而用意深微殊不可及因來書垂詢聊貢

一一

與劉霞仙

尊惠薯蕷丸近日日服之尚無成效大箸遊記二首以義理言  
則多精當以文字言終少強勁之氣自孔孟以後惟濂溪通書



橫渠正蒙道與文可謂兼至交盡其次如昌黎原道子固學記  
朱子大學序寥寥數篇而已此外則道與文竟不能不離而為  
二鄙意欲發明義理則當法經說理窟及各語錄劄記錄居業  
錄困知記思辨錄之屬欲學為文則當掃蕩一副舊習赤地新立將前此  
所業蕩然若喪其所有乃始別有一番文境望溪所以不得入  
古人之間奧者正為兩下兼顧以致無可怡悅輒妄施批點極  
知無當高深之萬一然各有本師未敢自誣其家法以從人也  
論文凡說當錄出以污尊册然決無百葉之多得四十葉為幸  
耳李雨蒼雲麟即去冬上萬言書者企仰令問特往趨叩予以  
一函為進謁之資乞進而裁成之

書札卷六

六

覆李次青之太夫人

頃專使至接奉來牘情詞懇切語語非虛披覽之餘不忍卒讀  
國藩在京十四年未能迎養老親前丁母憂甫逾百日即出而  
襄事在外數年毫無裨益王事靡盬家難復嬰今歲仲春丁父  
憂奔喪旋里實恐兩次奪情得罪名教為天下後世所不齒是  
以連疏陳情力懇終制 聖恩高厚俯如所請身雖恪守禮廬  
然有所抱歉於中耿耿不釋者上無以對吾 君高厚生成之  
恩下無以對彭雪芹李次青二人患難相從之義日夜悚仄如  
負重疚內以訟於心外以告於友朋並屢函告雪芹次青矣白  
湖口克復雪芹出坎窞之中遊浩蕩之宇國藩稍釋歉懷惟大



青則仍陷東方孤軍無援餉糈空乏道路梗塞音問罕通念其所處而寢食不忘者豈特慈母之於子然哉鄙人之於友朋亦何嘗須臾忽置也次青於我情誼之厚始終不渝岳州之敗星馳來赴靖港之挫從人皆散次青追隨賤軀不離左右出則嗚咽鳴憤入則強顏相慰潯郡之敗次青恥之恨貼身尚無勁旅亟欲招勇自行訓練以護衛國藩之身斯二者皆國藩所鏤骨銘心者也至於先合而後離我水而彼陸進退分合之際則次青與鄙人皆有不能自主者蓋人事居其半天事亦居其半天次青本居國藩幕府同住一舟司奏摺信械等件五年正月銳意欲招平江勇自行統率國藩曾沮止之初訂祇招一千在國藩

書札卷六

七

身邊護衛耳厥後招至三千已有能發不能收可進不可止之勢然猶同紮南康咫尺相依逮七月移師湖口國藩再三勸止如胡益南吳齊源及彭斯舉楊志伊輩皆所共知從此分離各居一方矣然猶去國藩未遠也及其湖口屢捷移攻撫州撫州一挫退紮貴溪於是既分而不能復合則因應變化殆所謂天事而非人力所能爲主也然江西東路未必不賴此一軍事久論定公道自明尊庶亦不必深慮國藩日內當械致江西婉商中丞方伯可否令次青告假回籍省親如軍務少暇斷無不允之理臘月間當遣人至尊府問訊鄙人一息尚存卽當時通音書休戚與共斷不令尊庶常憂危而已獨安樂聞次青有兩兒



不知有女幾人或平輩或晚輩有相當者可締婚姻而申永好以明不敢負義之心天寒歲暮尚祈珍攝白玉無任祝禱正封械間接次青十月十七之信知彼處軍事平安次青已於十月初八具稟請假回籍若見允則已可起程矣如未見允則此時致函已嫌其遲甚屬無益遂不復致

致彭雪琴

聞九江克復之喜仁弟晉秩方伯尚未馳函申賀頃接惠書敬悉一切仁弟之淒然欲絕蓋無刻不在吾心中目中國藩寸心千縷萬折知吾弟無刻不展轉也九江復後聞厚菴揚帆東下未審仁弟亦至安慶蕪湖等處否迪庵旋鄂收復黃安麻城

書札卷六

七

諭旨飭其入浙潤公留辦皖豫之交乞假之舉想不行矣僕讀禮山中簡寂無似每念數年在外嘗尤叢集官事私事不乏未了之局死者生者猶多愧負之言昨得潤芝中丞書報銷局部費渠可代爲設法此亦稍釋微慮之一尚有前後殉節者未曾給予卹銀擬即在水師銀錢所存項下一一發給乞閣下查明四年起至五年三月外江死事各員及五六兩年內湖殉難之營官哨官開一清單一面告鄙人一面傳知該員家屬卽由尊處發給並乞閣下卽日先發銀二千兩分送六處一係楮一帆一係林秀三源恩兩人皆有孤兒寡婦現寓長沙求每處先送銀五百金專人妥交長沙其應行找補之數將來另開清單補



足仍取各家領字存案又夏鳴之鑾唐得陞二人求每處先送三百金又白人虎伍宏幹求每處先送二百金以上六處二千金務求卽日妥辦其餘應行給發者卽當另單專付銀錢所次青處陣亡員弁僕亦有信囑其向銀錢所領取渠若有函與閣下請飭銀錢所一面先發將來敝處自有公牘與該所也

致胡潤芝中丞

接手函敬悉榮晉宮銜殊勳懋賞允愜人心慰幸曷已厚迪優賞亦其功實足以致之厚庵聞已東下不知率水師幾千前往雪琴果駐何處亦頗東行否安慶之賊想已無多從此略蕩平矣浙中賊數雖多亦或強弩之末饒廷選健者衢州必可無虞

書札卷六

九

卽有得失杭城亦自可保所慮渡浙而東甯台紹等府或被蹂躪耳迪公畱鄂極是爲天下計爲湖北計均須先清皖豫如天年荒歉尙恐變爲流賊西趨襄陽北趨南陽並可擾及關洛今豐熟如此汝當無慮敝處報銷似宜設於水次若設局鄂垣痕迹太重耆中丞去歲請國藩赴江其辭甚摯又請霞仙代渠草奏其意甚誠因僕固守不出始變而惱怒余自有款於彼彼固無歉於余也能設於武穴等處痕迹較爲渾融總攬大綱之人擬請伯符蓮舫篠泉三人篠泉精細圓適其從國藩也極久其爲國藩謀也極忠往年余擬專摺保之曾爲羅忠節兩次言之忠節亦極力贊成厥後因循不果行國藩之保舉稍吝不過局



度較隘至於次青篠泉之不得優保畢金科之不成功名則國藩實有蔽賢之咎中夜以思如何可贖今畢金科則長已矣次青篠泉二人萬乞閣下大力設法優保或畱鄂補用以私言之則國藩內有補於歉衷外有益於報銷以公言之則二子存心愛民必有裨於吏治必有贊於高深務乞畱意承允蔽處部費代爲設法豁如之度感佩曷極舍弟溫甫尚在李營否黃麻克復比移何處溫弟小試不售鄉試不中蓄爲深恥比之北行尚欲攘臂一入秋闈特以時過未耳昌言舍九弟亦以不得一第爲恨比在營公私尚順無復他念然鷺鳥思秋未能忘情國藩編衷無以化之閣下宏度弟輩所欽尚祈有以教誨

致楊厚庵

書札卷六

二

接惠書欣悉薄郡克復屠僂無遺六年悍賊卒就殲夷至爲慰幸旋聞黃衣酬庸並予優敘殊勳懋賞允愜人心舟師東下共率幾營安慶逆黨無多或可以虛聲下之金陵克復亦係指顧閒事水軍自始至終悉仗大力竹帛之勳遠軼古初黃國堯等前赴廬州造船不知近在何處巢湖之賊想久肅清若猶未也閣下凱旋之時請卽遶至東關漕河一帶乘便掃蕩並挈黃范等出江至囑至囑撫建等處之賊東犯浙中前有議以閣下舟師由太湖援浙不知果可行否國藩寂守禮廬靡善可陳所幸賤軀猶適足慰綺廬報銷所需部費頃潤公許代爲設法或尚



易了做同年李復生聞現依尊幕尚祈照拂爲荷

致左季高

潯陽撫建次第克復吉安孤城想亦不久可下舍九弟性不能耐已屢械助之衢州久無確音饒鎮健者必可堅守衢全則杭自無虞惟閩中極窮不知何以籌維粵中團勇報捷蓋意中事逆夷所長者船也礮也所短者路遠也人少也自古稱國富者以地大爲富兵強者以人眾爲強耳英夷土固不廣其來中國者人數無幾欲恃虛聲以懾我上國粵民習知其人之寡技之淺故官畏鬼而民不甚畏鬼與之狎也此次與之確鬪彼必不能堅守此後官兵之氣日強矣往時徐松龕中丞著書頗張大

書札卷六

五

英夷筠仙歸自上海亦震詫之鄙意彼蹈驕兵貪兵之二忌恐不能久得尊械開示益知吾圉之無虞耳惟來示英咪法俄四國合而圖我昔聞英夷與俄羅斯世爲仇敵不知何時媾合夷狄以利交利盡則交疏連雞不栖或非深患又俄夷王庭雖在秦西然大段山國也如欲與我爲難恐當從西北闌入未必迂由海道茲亦可疑者便中尚祈詳示敝邑大水爲災縣城永豐最甚敝處託庇平順賤日日益蒙花山中雖僻左亦聞有親友酬接醫者謂宜屏絕人事獨居深室閉目靜攝敝處求幽靜禪室當在南嶽去家遠者百里近者數十里違離禮次亦非所安

附告以慰塵注



九江克復林逆與各劇賊無一漏網積年公憤如鯁斯吐撫州相繼收復麾下憤悒亦爲一雪昔如移山今若拉朽揚雄有言雖其人之膽智哉亦會其時之可爲也比聞台旆尚在玉山浙中有賊餉項彌窘此軍之興閣下獨爲其難且久任其難中夜以思慚負良深撫建之賊究竟入閩抑仍竄浙久無確耗三衢得保杭城自可萬全東路甯紹等處或不免於蹂躪耳舍九弟在吉安頗尙得手長壕久成飛走路絕六七月間或可克復敵處報銷部費需款甚鉅頃商之楊彭在於華陽鎮釐金項下籌辦胡中丞亦允代爲設法其水師銀錢所尙有存款萬餘僕擬作爲卹亡之費如貴平江營歷年陣亡之營官幫辦哨官等已屬不少勇則爲數尤多請先將營哨幫辦之必不可不卹者開一清單檄告雪琴若在三千金內則全數取來若爲數太多則先取若干下欠若干由雪琴與閣下酌量辦理僕頃有畱告雪公也蔣君比署粵西臬司又帶兵克復梧州位望正隆同事諸公獨閣下久困卑位僕之愧恨曷有窮極蔽賢抑功兩無所道但冀旦晚凱旋謀一良覲稽首謝咎然後追憶雪爪從容傾吐悲憤歌泣當不復能名其何以爲情也

致李次青

六月初三日接奉 寄諭飭令馳驛入浙辦理軍務瑞臨撫建



潯湖之克未得躬與其役浙事方殷攘臂再出本非趨時之善而藉此得與閣下相見一抒愧歎積忱在鄙人爲稱心滿意之事憫其烏私而暫令守制又不棄鴛鴦而曲加器使在 聖人實高天厚地之恩茲定於初七日起行大約七月可至玉山與閣下握手矣張運蘭肅啟江兩軍夙稱勁旅益以舍弟及閣下兩軍已滿萬人又抬舳板過常玉山酌帶水軍千餘足敷剿辦兩湖奏明每月協餉四萬此外所少無幾亦一善也此次之出約旨卑思但求精而不求闊可合而不可分所有應辦事宜及前此錯失應行改弦更張者敬求一一詳示二十五日湖南中丞奏請起復國藩援浙與二十一日京發 寄諭適相符合亦足異矣

書札卷六

三

致左季高

浙中衢州解圍處州及江山常山永康等縣皆已收復聞龍泉賊亦不少聞之浦城亦有大股屯聚河口去浦龍二縣均近我軍仍應於河口取齊弟奉 命赴浙俟浙省肅清乃敢議及閩事大約石逆麾下能戰者少但伺兵少之處奔竄全數入閩亦意中事閩民強勁若爲所煽誘亦恐其凶燄復張回竄江西浙中若探得石逆確蹤擒賊擒王餘黨當尙易辦特乏極好偵探耳弟於初九自蘭溪開行十二夜至湖口厚庵軍門自蕪湖歸來患腰痛氣色少遜雪琴則神采奕奕湖口石鍾山新立水師



昭忠祠厚雪囑爲一奏弟擬會厚迪銜奏之以迪獨修塔公祠於九江亦欲一奏也

### 致李迪庵中丞

得胡伯母仙逝之信不獨僕與賢昆仲厚雪數人者失所依倚實關係東南數省大局安危聞鄂省眾議欲官帥奏請潤帥於百日後強起視事不知潤帥官爲蒼生行此權宜否此事殊難協宜古來似此關係絕大之人亦不多也潤公聰明本可移入霸術一路近來一味講求平實樸質從日行俗事中看出至理來開口便是正大的話舉筆便是正大之文不意朋輩中進德之猛有如此者其於朋友純用獎借而箴規卽寓乎其中一旦以憂去位不特公事棘手而吾輩亦少切磋警惕之益國藩至湖口暑後傷風病中聞胡伯母噩耗愴然不復能爲懷想賢昆仲必有同情也

### 致胡潤芝中丞

十四日恩恩奉唁數行亮登荃照頃得次山壽山信知秀帥出奏時附陳閣下一身關係安危甚重不知出自何人手筆想尙得體年來新造江漢皆閣下心手厝注知人之明用人之專所致恐中朝未盡周知若從大處一爲抒寫使眾人知時流中有如此襟懷氣局不與倉卒成功名權宜就事會者相等庶與閣下力求澹樸平實之指相合此次摺稿侍亟思一見也伯母靈



馭定於何日起行還湘經手事件尚易清釐否各處局紳不遽  
形渙散否至爲懸系朱品隆十五日至九江已令其十九日開  
行由陸路至吳城登舟水路至貴溪侍竟須晉省一行帶船三  
四號餘船不晉省由鄱湖東渡至貴溪等候吳國佐無信想改  
陸矣侍擬十九日別湖口而上在章門不過小住二日此後相  
去日遠可勝悵結謹具祭幛一懸輓聯一副銀二百兩少佐扶  
襯時賞需伏希晒存專楊名聲賞上代躬叩奠伏惟節哀順變  
爲天下自重

致胡潤芝宮保

自聞尊處家艱寸心彷徨如有所失欲勸閣下權宜奪情則非

書札卷六

三五

夙昔以大賢君子相佩相期之意欲聽閣下執經守禮則侍與  
楊彭二李諸君失所依倚侍之拙直尤恐動多齟齬莊生所謂  
失我常與我無所處者也不審季高希庵立議云何便中尚望  
惠示一二

覆李希庵

接周壽珊信得讀 諭旨及官帥綿將軍前日奏章以朝野官  
紳軍民倚望之殷潤帥實以不遽去位所全較大然潤帥近日  
扶持善類力挽頹風於人之邪正事之是非剖判入微不少假  
借有權術而不屑用有才智而不自用皆大過人之處兩奏皆  
未能道著一二潤公之識不有輕言奪情吾輩愛之深者亦何



能輕以相強也吾鄉數人均有薄名尙在中年正可聖可狂之際惟當兢兢業業互相箴規不特不宜自是並不宜過於獎許長友朋自是之心彼此恆以過相砭以善相養千里同心庶不終爲小人之歸足下用心甚深進德甚猛亮以鄙言爲不謬也

### 致李次青

東來無可怡悅獨幸得與閣下相見一吐愧負之懷用爲至慰未及彌月遽爾握別悵歎何極螭灣上清等處多佳山水以無夫可雇軍行甚滯亦不惡也初六日至楊田聞南豐初四日告陷想卽宜崇股匪聞賊之窺新城者已爲印渠擊退凱章初六白金谿赴南豐此股或易了也閣下何日抵玉山何日起行

### 書札卷六

三

南旋廣豐玉山守城案內保舉單望卽日開出十月決當出奏一改向來淹滯之習六年夏閒曾請開列尊堂上兩代名氏以備咨部請封厥後因循竟未舉行負疚之端此爲最鉅頃尋奏摺箱內猝未檢獲敬求再開一條迅速交到玉山前摺批回曰卽當先清此件此出他無所求但得督辦報銷清償夙諾俾累年過舉少有歸宿是則寸心所粗幸者耳歛縣老中營旣隨我以行其各營從幼丹者餉項究出何處亦乞詳告

### 與左季高

尊意欲弟於江西設一樞紐以速文報弟擬卽以胡心庠蔚之管理此事蔚之曾在敝處辦過書啟係鄭蓮舟之甥生長湖南



現在江西候補知縣省局派管蔽處支應尙覺相宜次青於初  
二日自港口告別至玉山清釐各件卽回平江省親訂十一月  
初間來營次青到後人瑞意城均須更替回湘九舍弟來建昌  
一會後卽由章門歸楚計十月可抵家矣潤公已到家否渠再  
造江漢糜爛之區變爲富強意量之遠魄力之大中樞尙尚知  
之未盡守制不出自是正理然以時勢物望揆之又似非得終  
請者弟處之事自潤公出位全局皆呆恆自晒也

### 與官秀峰制軍

浦口之失實在意之外久盼金陵大功告成至是又不免遷  
延矣閣下以唐義渠一軍赴皖會剿而調湘寶兩軍分防潯彭

書札卷六

七

蓋籌周密實深佩仰惟義渠新集之師亦須附勁旅以行數仗  
後乃能確有把握自潤帥南歸後閣下兼管兩署之事又兼監  
臨鄉試又兼辦皖豫軍務蓋勞之狀可想而知鄂省前辦報銷  
各船廠若何開報快蟹每隻價值若何長龍舳板價值若何便  
中敬求示及一二

### 與胡宮保

自八月八日得見次青幼丹後無刻不共頌閣下近事幼丹近  
亦猛進心地謙而手段辣將來事業當不減於其舊惟刻思引  
退亦是書生不耐事氣習次青告假兩月幼丹羨爲登仙次青  
則苦極甘回興復不淺其營務亦略有起色但規矩尙鬆耳張



凱章誠健者其軍亦特爲江右官民所敬愛蕭浚川年五十餘  
英姿尙自颯爽劉印渠在軍七年頗厭兵事而其下得賢將領

三人江味根李明惠劉觀莊爲他軍所不及比調成章鑑來營其才似

勝於朱品隆不知打旱仗本領何如勝帥總統皖事不知於迪  
事無礙否若有牽掣恐不能不煩我公出而扶助之

### 與駱籥門中丞

據探丁自閩中歸者皆言彼中苦况迥異尋常大軍入關後勇  
夫託辭告假者必多蓋離湘太遠山路崎嶇銀賤物貴數者皆  
非軍士所願必須口糧稍充卹養等項立卽給發庶幾踴躍用  
命若常在江西境內卽稍欠一二月尙無礙也浦口之變實出

書札卷六

天

意外金陵大營前後派出七千人渡江助剿俱爲所敗頃又以  
六千人交張軍門由京口渡江剿辦當可得手然久盼金陵立  
下至是又鬆懈矣豈天心未厭亂耶甯國鄧軍門之師近聞亦  
極疲茶李鎮定太好修邊幅不講實際幸近日賊勢極衰否則  
浙西皖南皆未可深恃也

### 與左季高

印渠得見數次與三十年在京朝考初見時無異近歲外間多  
毀之者閣下亟稱其忠良洵知言也江北浦口大營失利後六  
合天長儀徵相繼不守和帥奏明以張殿臣統六千人渡江剿  
之陳玉成久稱悍賊若張殿臣能殲除此股則淮南江北事或



易了潤公不出自是天理人情之至惟勝帥總統皖事不知迪庵能伸縮自由不受牽掣否設有爲難之處非潤公不能扶助而安全之也胡伯母處閣下有輓聯否拙聯亦頗闊但嫌似墨卷耳近又作湖口水師昭忠祠聯云巨石咽江聲長鳴今古英雄恨崇祠彰戰績永奠湖湘子弟魂出句自寓感慨對句寓獎於哀此不似墨卷矣又塔忠武祠聯云大勇卻慈祥論古略同曹武惠至誠相許與有章曾薦郭汾陽閣下看去得否

### 與鮑春霆

足下數年以來水陸數百戰開府作鎮國家酬獎之典亦可謂至優極渥指日榮晉提軍勳位並隆務宜敬以持躬恕以待人

書札卷六

完

敬則小心翼翼事無巨細皆不敢忽怒則凡事畱餘地以處人功不獨居過不推諉常常記此二字則長履大任福祚無量矣

### 與李希庵

迪公處兵力雖強而斷不可分分則力單且無統領之才一敗則大勢爲所掣動僕已飛檄告迪庵與溫甫望閣下更詳言之賤軀倘適惟目力日眵癘疾大發難以調養遽痊蓋老態漸增也

### 與李迪庵中丞

安慶之事當易得手若能先破安慶則楊彭水師可由樅陽河且達桐城並可由運漕河以達巢湖而抵廬州貴軍能與水師



處處相依米糧子藥庶幾易於運解若全由潛舒等處陸運軍行終不免於濡滯敝處因閩中無米又無河運日內亦大費周章今年勇夫病者極多九舍弟帶千五百人來建昌途中又病二百人告假歸矣貴軍病者尚不多否念念寶勇在建昌者四營共千七百人官帥調赴九江換防須令全數拔營赴潯寶勇近日聲名平常建昌紳民怨之既患騷擾地方而驕惰氣習亦似不可復振且今秋在建昌病死者至四五百人之多又可憫也

### 致郭雨三

近聞賊目陳玉成由廬州竄至浦口德帥大營被陷天長儀徵

書札卷六

三

相繼不守六合揚州岌岌可危未知我親家在郡亦有勁旅若干足資捍禦否瀛蒼倉卒出避何處張軍門統兵六千渡北援揚能迅速掃除此股否不勝懸念先此飛函奉布少遲更當專人往候起居金陵克復本係剋日可待添此一波恐又不免遷延矣豈天心尚未厭亂耶抑此賊將滅如燈之將熄迴光乍明耶四海厭苦兵革久矣弟亦以目昏精疲不復耐事日夕盼大功之速葢江北軍事餉事尚望親家時時惠書示我梗槩不勝企幸

### 與羅少村

足下後邁之骨深遠之識方今四方多虞計必不能久處囊中



竊以先哲經世之書莫善於司馬文正公資治通鑑其論古皆折衷至當開拓心胸如因三家分晉而論名分因曹魏移祚而論風俗因蜀漢而論正閏因樊英而論名實皆能窮物之理執聖之權又好敘兵事所以得失之由脈絡分明又好詳名公巨卿所以興家敗家之故使士大夫恍然知戒實六經以外不刊之典也閣下若能熟讀此書而參稽三通兩衍義諸書將來出而任事自有所持循而不至失隊叨在知愛輒忘其愚陋妄貢區區

### 致胡宮保

接岳陽舟次惠緘敬悉扶奉靈櫬八月杪安抵里門至以爲慰

書札卷六

三

日內酬接紛繁悲喜交集冗忙之狀抑可想見猶聞盡懷刻刻不忘天下至計鄂中軍民暨楊彭二李並敝處事件時切縈慮襟抱之宏風誼之篤金石可穿豈僅吾黨數人次骨而已張凱章一軍於二十四日拔營由杉關入閩蕭軍二十七八拔營由廣昌石城入閩洋口之匪爲周天培所破現已歸併順昌數不滿萬土匪居多汀州之賊亦甚散漫無紀閩境山多水寒米貴異常賊之死於無食死於地氣者動以千計沿途狼籍無人掩瘞現在州縣次第收復賊黨無心戀閩將告肅清實不盡由官軍之善戰也敝軍自抵建昌病者極多張營二千七百病者近八百人吳營一千三百病者逾四百人不知入關以後氣候更



復何如日夜焦慮九舍弟以二十六日抵建所部撤去其半帶  
千二百人來此鄂中八九十月餉尚未見到日內枯涸特甚已  
緘商駱帥湘省請益萬金雖恃季公內應未知果允否也討賊  
則可服官則不可義正辭嚴何能更贊一語惟今日受討賊之  
任者不若地方官之確有憑藉晉宋以後之都督三州四州六  
州八州軍事者必求領一州刺史唐末之招討使統軍使團練  
使防禦使處置應援等使遠不如節度使之得勢皆以得治土  
地人民故也叨在道義知交之末萬不敢以奪情服官奉挽強  
起然離土地人民而以奉使自效則介而離山陽而失水亦恐  
不足發抒偉抱尚望熟思而審計之尊體素非甚強年來提振  
支撐不無虧傷及此廬居少暇保畜珍護慎惜天下之躬以副  
中外之望幸無多分憂慮致違棟練

與彭雪琴

僕觀作古文者例有傲骨惟歐陽公較平和此外皆剛介倔强  
與世齟齬足下傲骨嶙峋所以爲文之質恰與古人相合惟病  
在貪多動致冗長可取國朝二十四家古文讀之參之侯朝宗  
魏叔子以寫胸中磊塊不平之氣參之方望溪汪鈍翁以藥平  
日浮冗之失兩者並進所詣自當日深易以有成也

與郭筠仙

前接六月惠緘未卽修復比聞保送南齋未遂入直督學奉使



亦不獲與伏審瀛館高寒清修多祐至以爲念國藩自六月七日山中起行長沙住七日武昌住六日湖口七日其中病臥五日南昌住二日以八月初八日晤次青幼丹於河口本擬由鉛山入崇安以閩賊回竄江西之金盪安仁等縣令張凱章回師截擊幸獲全勝續擬由雲際關入閩又因大股二萬人竄擾新城改道由建昌杉關進發重九日行抵建郡閩中米糧缺乏百物昂貴百錢不能供一飽銀價銷落每兩僅換八百餘文山多水寒氣候稍異賊之死於飢餓死於疾疫者沿途狼籍官軍病者亦極多張凱章所部三千七百人病者千零數十吳翔岡所部千三百人病者四百有奇劉印渠所部四千人病者千餘故

者將近五百死喪之威不寒而慄此鄙人從軍以來所未歷之景象也俟冬令氣斂或當以次痊愈閩賊勢極散漫氣已衰落現派張軍由杉關入蕭軍由廣昌后城入倘病卒漸愈閩事或尙易於勾當賤軀託庇倘適惟目光昏花泊不復痊益老態籠東非藥物所能爲力意城親家偕我以出公牘私械皆代爲料理數月以來無事不了治事之才殆勝阿兄元方之難難於上青天矣次青入幕一月因太夫人忽患臂痛請假歸覲十一月可仍來營九舍弟克吉安後二十六日已至敝處十月當還家一次明春與意城偕出後泉家被賊焚劫挈眷至南昌日內亦卽來營小泉亦約來此一敘風雨如晦雞鳴不已古人不余誣



也

與駱籥門中丞

九舍弟荷蒙優保銘感無極吉字中營之勇現率千二百人來此病者亦多今歲軍中疾疫特多似往年所未經見又銀價特賤米糧特貴勇夫月支之四兩二錢若三兩者與昔歲同而所獲之實利暗損其半是以此次專人回楚招勇夫者皆賞費以往從應募之日起支不似前此之踴躍來投矣張殿臣軍門渡江後於九月十六日克復揚州未知六合比已解圍否北岸稍清後張軍仍當南渡浦口和州若無大軍駐紮金陵接濟終不能斷和帥派援江北者先以二千人繼以五千人最後則殿帥之六千人而來文已有老營空虛岌岌之慮似金陵人數亦不甚多而外閒爭稱每月額支四十萬豈傳之失真耶

與蕭浚川

軍行以水泉甘潔為最難得之境頃凱章在資福橋泉水清美營中病者立見痊癒數十人未病者即不復發閣下若覓得泉甘野曠之區不妨小駐數日探明賊之大股所在然後前進其無活水清泉之處不可駐也

與饒滌甫

弟自至建昌察看南城被賊蹂躪城廂及附郭三四十里室廬蕩然目不忍觀聞南豐新城二縣被害尤酷四月克復邵城至

書札卷六

五



今商民尚未復業頃見閩省賊蹤日遠始出示招之來復大抵  
粵賊之出各省浩劫以江西安徽爲最鉅江西又以南豐新城  
爲最甚忝在行間捍衛無術慙悚曷極賤軀仰託鴻庇平善如  
恆惟目光眇昏有似六七十人精神亦迴不似昔常恐疎虞隕  
越仰貽知己之羞尙冀時惠箴規俾有持循千里神交懷相敬  
畏則貺我良多耳

與左季高

夷務果有翻局不悉聽其所要是極好機會然國家之強以得  
人爲強所謂無競維人也若不得其人則毛羽未滿亦似難以  
高飛昔在宣宗皇帝亦嘗切齒發憤屢悔和議而主戰守卒

書札卷六

五

以無良將帥不獲大雪國恥今欲罷和主戰亦必得三數引重  
致遠折衝禦侮之人以擬之若僅恃區區楚材目下知名之數  
人則干將莫邪恐亦未必終不刎折且取數太少亦不足以分  
布海隅閣下以爲何如官帥之意以唐義渠率三千人赴臨淮  
助袁午帥以普鎮寶勇劉牧湘後營循大江南岸以下達蕪湖  
實則普劉難以獨當一路而唐公亦尙不辦此鄂兵日增而餉  
源日減非潤帥強起恐終不濟也任署與否接篆與否均不甚  
關緊要所爭在另簡新撫否耳然以潤公之威望才氣羽翼旣  
成亦非他人所能牽掣造寶塔者合其尖或者少從權宜終濟

巨川乎



覆胡宮保

此間張凱章於廿四日拔營初六日始入杉關度關後勇夫又病百餘前畱病者八百餘人在建昌調養拔營後又病三百餘吳翔岡營病亦極多印渠楚勇病者至十之八死者五百有奇頃自新城拔回建撫調養不復成軍實無良法治之湖北事勢日以浩大非先生強起終恐敗壞頃讀慰畱諭旨似亦難於固謝義渠帶三千人赴助袁軍調荊州兵赴皖調普劉全軍至潯彭將令其直下蕪湖此皆耗糜巨餉未必果有實濟前接迪庵信囑國藩請益於鄂頃以書牘請益而復械未應何也當再免之

與李迪庵中丞

書札卷六

三

國藩往年經過桐城猶記大關一山悅判南北自大關以北儼若淮北風景自大關以南儼若江南風景不知湘勇至舒以北尙服水土否無疾疫否此間入閩之師病者甚多極焦灼也前與閣下面商雄師環繞巢湖周圍攻剿不知果有當否如果芻言可采則廬州克復必須擊剿廬江巢縣無爲等屬不宜北向定遠亦不宜分兵北行必須安慶克復與楊彭水軍會合乃可徐圖下游耳

與李希庵

令兄迪庵軍事僕前囑其環繞巢湖擊剿傍湖各屬不必兼及



淮北頃又囑其不必北及定遠又於舍弟書中言不宜遠離水師以固根本不宜徇人情面而分兵力二語是迪軍要訣不知閣下以爲何如迪公近日聲望鼎隆閣下名譽亦日增赫奕舍九弟比亦薄有聲望鄙人在外毀譽互見然究係毀者少而譽者多清夜自思尚覺名浮於實十倍百倍也吾輩互相砥礪要當以聲聞過情爲切戒意城此次在敝幕深資其力公牘私緘一一代辦識見論議多與相合故雖精力耗竭而目下尙無廢閣之事足慰廩注

與孫芝房

別來數年不知閣下遂已驟進若此雖不敢謂躡躋古人然意

書札卷六

三

量之閱考核之博情韻之深固亦杜君卿馬貴與顧亭林數君子者徒也國藩從戎數載一事無成而坐荒故業愧恧何極來書讀至末幅令人惘惘不知所以爲懷憂能傷人伏冀保攝千萬武昌有張廉卿裕釗學爲古文筆力少弱而志意高遠好學不倦若邂逅相見幸有以獎進之羅少村世兄亦英跼不羣曾否進見

與沈幼丹

弟日內目光尤蒙不知何故老境逼人殆非藥力所能挽回亦遂不藥耳翰臣方伯廉正之風令人欽仰身後蕭索無以自庇不特廉吏不可爲亦殊覺善不可爲其生平好學不倦方欲立



言以質後世弟昨賻之百金輓以聯云豫章平寇桑梓保民休  
訝書生立功皆從廿年積累立德立言而出翠竹淚斑蒼梧魂  
返莫疑命婦死烈亦猶萬古臣子死忠死孝之常登高之呼亦  
頗有意位在客卿慮無應者徒用案獻韓公有言賢者恆無以  
自存不賢者志滿氣得益自古而歎之也

### 與袁漱六

洋鎗不甚得用近始知之祈閣下少買或十支二十支足矣如  
已買成難退則祇得聽之閣下贖書專取宋元人佳刻僕意時  
代不足計但取校刊尚精刷印最初者爲妙苟宋元明之板而  
刷印於今日猶漢唐碑帖而今日搨之剝落補湊夫何足貴苟

### 書札卷六

三

有佳紙初搨則官板如康熙之周易折中書畫譜乾隆之十三  
經廿四史之類私板如國初之汲古閣近日之黃丕烈孫星衍  
秦恩復胡克家張敦仁諸影宋本亦何嘗不可奉爲至寶尊處  
廣蒐羣籍如遇有殿板諸善本及國朝名家所刊之書凡初印  
者概祈爲我收買惟佩文韻府淵鑑類函等向非所好不必購  
之此外殿板書初印者多可取也其價銀若干覓便寄呈來弁  
過尊處後卽至兩三親家處望閣下先復一槭以慰拳拳

### 與張凱章

頃得來書知已趕緊料理成行因夫少而少延刻下想有頭緒  
矣用兵之道與讀書同不日進則日退須日知其所亡月無忘



其所能爲妙貴軍之剽迅輕捷本屬難能故願閣下無忘所能也

### 與王雁汀制軍

此間近况鈔錄旬日所奉諭旨及奏章各一通咨達冰案便可悉其梗概珂鄉大兵之後繼以疾疫民間流離凋瘵迴非意想所及良禾在畝無人收穫或官爲雇人刈收不數日又中疫而去道殣相望接省城鈺夫先生林鏡帆諸公來槭均以時艱孔棘殷殷致訊王制軍力疾視事似於僚屬不甚融洽幼丹爲國藩辦理糧臺情好良篤惟渠貞白寡諧無刻不懷引退之志近因翰臣方伯淪逝雙坡太守丁艱尤用落落行當慰勞護持

俾氣誼不孤耳

### 與李希庵

書札卷六

三

三河之敗敝處接雪琴信僅有聞迪庵已往六安溫甫後石均至桐城二語究不知其確否令兄旣辦全軍營務又管潯湖彭澤諸軍又管奏摺又管書信又兼顧安慶廬州各路又日日親出打仗雖有金石之軀亦將不堪其勞况人之心血有限豈不愈用愈枯吾前欲閣下去助令兄正恐百密中之一疏耳此後重整軍威無論令兄行抵何處閣下切不可離開一步閣下抵桐城後乞將初十日所以致挫之由詳細書示俾僕亦得增長

閱歷令兄回營須大爲將息再圖整理



與羅澹村

迪庵一軍分駐九江湖彭又分朱副將等至敵處又分希庵雷防湖北又分趙克彰防守桐城兵分則力單將分則謀寡迪庵以一身而兼管籌兵籌餉及應酬各處書啟奏牘等件又每戰必親自督陳人之心血幾何固宜百密而不免一疎也揆帥至誠待人愛才如命閣下與諸君子於迪庵尤極摯厚曰內所以保固而慰安之者想極周渥四眼狗陳逆雖稱狡悍然實非迪庵之敵計不久即可復振特國藩相隔太遠三日無確耗焦灼難狀耳

與張仲遠

書札卷六

早

來檄論胡宮保事酌古準今理明辭顯即日當鈔一通寄至益陽與之熟商細繹孔子所稱從其利者吾弗知也似苟非從其利者聖人猶將許其舍禮而行權後世不講於此心之謀利與否而概援一權字以自覆往往爲史氏所譏或稱陰規起復或稱風某某奏請起復覆軌相尋雖以安溪之賢而彭古愚彈章不能無登於青簡鄙人去歲遲疑審慎蓋亦自慮其從利也胡公之關繫安危百倍於鄙人若因皖北之挫而強起則其非從利者較然無疑儀禮圖板藏何處風便仍祈惠餉

致胡宮保

趙克彰寄詩之信係十五夜所寫來勇係十七起行去初十敗



仗之時已六日矣迪庵與舍弟溫甫殆無生理迪庵激烈之性必不肯倖逃以圖重振舍弟與之至親同舟共命必不肯舍之以去皆一定之理平日佩仰迪庵之德量以爲必就大功而享厚福通邑無賢愚老少皆無異辭今決裂至此所謂天者誠難測耶此時若非台端強起恐希庵孤衷無與爲扶持而保抱之者迪庵成名以去萬古不朽矣大局何堪設想舍弟溫甫讀史有識而文不克盡抒所見經世有志而所如常多齟齬亦不敢不略陳於大君子之前也

### 與左季高

廿九夜接官帥信欲弟撥兵回援湖北或親督全軍赴鄂已飛

書札卷六

早

章入告矣弟思分兵赴鄂則恐不足以資剿辦欲率全軍以往則聞賊必回竄江西殊難爲計且弟前此因分軍而無以自立又目擊羅李分軍之失實不敢輕於言分憂灼之餘規畫恐失祈詳告爲荷

### 致官中堂

舍弟國華溫甫在迪庵營中同時殉難公憤私感痛恨何極援鄂之舉日內亦熟計之一則思爲迪庵與舍弟復仇二則顧天下大局鄂先於閩三則閣下與潤帥暨湖北官紳眷待之厚刻刻不忘惟汀州及瑞金等處尚有賊十餘萬人閩之師難遽撤回若分兵援楚又恐少不濟事必須弟挈全軍以行或可稍有



裨益以是難於定計以迪庵器量之閎行軍之慎而猶有此控  
所謂天者誠難測耶舍弟讀史有識夙懷大志而落落寡合與  
迪庵兒女姻親相得甚歡決不肖舍迪庵而出以圖生知關垂  
注附呈一二

與耆九峰中丞

閣下囑弟移駐九江較之秀帥邀弟赴鄂及撥兵助鄂兩節更  
爲妥善將來恐終不能出此策之範圍惟聞中瘠苦異常弟久  
駐建昌遲遲不入關迹頗涉於畏難而就易辭苦而戀甘縱  
聖主不以見責聞中官民固已交疑之矣若非聞賊漸就肅清  
弟自不宜遽奏移潯夷人火輪船四號二十三日過潯二十四  
五可以抵鄂鄂中一波未平一波突起全局頓壞誠出意外耳



曾文正公書札卷七

覆鄧寅階

接得惠書如親教言卽維興居輯祐爲道日益至以爲慰弟于役江浙倏閱五月賊勢日衰方冀逐漸蕩平不意迪庵三河失利全軍潰散近并有都鮑軍敗之信嘆夷逆船駛入長江直達漢口大局破壞迴出意料弟夙夜兢業罔敢疎虞惟目光昏花近更增甚常恐隕越貽知己羞小兒紀澤作四書文閣下專教之學陳勾山管韞山文最得要領鄙意勾山尙有非淺學所能領悟者若專學韞山或更能主一無適用志不紛澤兒前稟請學作他藝弟告之以學作賦蓋以賦之爲藝可以道古可以適

書札卷七

今也嗣後每月六課令其逢三作四書文逢八作賦可耳敬恕二字細加體認實覺刻不可離敬則心存而不放恕則不蔽於私孟子之所謂推所謂達所謂擴克指示至爲切近中庸之十三章論語之告子貢告仲弓皆以恕字爲開宗要義大抵接人處事於見得他人不是極怒之際能設身易地以處則意氣頓平故恕字爲求仁極捷之徑來示以致知爲大頭腦工夫鄙意敬是平日涵養之道恕是臨時應事之道致知則所以講求此敬講求此恕者也質之高明以爲何如來示以意氣意見爲累而以局中人作局外想鄙意作局外想猶訟者設身而處詞證之地若聖門所謂恕者能近取譬是原告設身而處被告之地



也竊謂意見意氣亦惟強恕者足以平之忍字因字謹當奉以從事

### 致李希庵

二十八日奉致一函不知何日可到其時但聞令兄迪庵已突圍至六安州舍弟溫甫已至桐城以爲全局無甚損也旋接趙克彰十六日發信官宮保二十三日發信始知前信之不可恃茲又閱三日矣令兄及舍弟殆無生理憂皇之至特專人至尊處條詢一問迪公與溫甫下落并筱石槐軒龍臣諸人得脫免者若干一問三河十二營營官存者幾人兵勇存者若干人桐城九營潰敗之信確否營哨兵勇存亡若何一問都鮑退紮石

### 書札卷七

二

牌信否太湖小池口是否保守得住水師在樅陽河者是否如舊一問閣下現駐蘄水收集得敗兵若干九舍弟由外江回湖曾否至尊處奉訪閣下向來體氣非強經此番憂憤之餘尚能勉強支持否壽珊兄尚在尊處幫辦否一問胡宮保能否即日來鄂湖北商民尚無遷徙者否官帥欲國藩撥兵赴鄂或親自援楚僕以少撥則無濟於事多撥則須親率以行而闔事未了江西又虞回竄頗難妥叶究竟湖北現存兵勇尚敷堵剿否一問此次三河出隊之營何人先敗守壘之營何人先走可執法懲治否一問三河之案亮已入奏有稿否六舍弟初十日情形

閣下盡知之否諸祈一一縷示



與陳作梅

國藩年來展轉戎馬百無一成老態日臻深愧無以仰對良友  
惟軍中稍暇尚親書籍不敢盡廢故業又樂近正士喜聞迂直  
之言以自警此二者尚頗兢兢冀不終爲君子所棄閣下若肯  
翩然南來晨夕驩聚矧愚起懦其爲惠益豈有涯量此閒從事  
如沈幼丹李筱泉張伴山諸君皆與閣下同年交契卽幕府如  
李次青郭意城暨水陸諸將雖於閣下無平生之歡揣其氣類  
亦自當蒼異而岑同鐘鳴而霜應企仰旌從千萬無吝

致郭筠仙

十月二日奉呈一檄由江西摺弁寄京計已上徹左右厥後十

書札卷七

三

餘日而有三河之變迪庵殉焉舍弟溫甫與筱石槐軒并及於  
難匪獨國藩一家之不幸抑天下大局之憂也比官制軍奏請  
敕軍赴援江北剿皖而固楚一奉諭旨自不能不先其所急  
舍閩而圖皖惟閩賊分布於汀龍甯贛之間未受懲創此軍一  
動將來仍爲閩粵江西三省之患而國藩以飽歷艱虞之餘新  
遭友于之慟實亦意象蕭索念逝者遺骨莫收而家叔殷憂莫  
釋中夜以思淚下如雨九舍弟由鄂還湘尚無來書亦用懸懸

與胡蔚之

星子積疲之區人人視爲畏途閣下此行計亦不甚稱意然初  
登仕版經歷艱苦將儉約規模立定將來卽得美缺亦守約而



不改其常則其爲益於民益於己者多矣舍弟溫甫能與迪庵同日殉難可謂得所特遺蛻莫收思之深慟皆吾負疚於天以虐及吾弟也悔憾何極

### 與胡宮保

國藩自聞三河之挫卽思分兵往助二十九日接官帥信囑侍親率一軍往援十一日又接駱中丞抄送摺稿亦有欲侍卽赴江北之意計可先後奉 旨如飭侍移營赴皖則當挈凱章及朱唐吳等軍以行如 諭旨畱侍辦閩事則當撥二千餘人往濟希軍不待尊囑也希庵體弱不甚耐勞不知九舍弟過湖北時能少畱助之否六舍弟從迪庵殉節得附忠義之林無甚悲憾惟遺骨莫收思之至慟生無以對吾叔父與諸昆更無以對吾親於地下念吾友江塔羅李暨吾之昆弟皆堂堂以去俎豆馨香而吾獨視然人閒亦何益哉

### 與沈幼丹

新任建昌王太守正派而英明似是有爲之才尊兄德卜有鄰矣竊觀自古大亂之世必先變亂是非而後政治顛倒災害從之屈平之所以憤激沈身而不悔者亦以當日是非淆亂爲至痛故曰蘭芷變而不芳荃蕙化而爲茅又曰固時俗之從流又孰能無變化傷是非之曰移曰淆而幾不能自主也後世如漢晉唐宋之末造亦由朝廷之是非先紊而後小人得志君子有



皇皇無依之象推而至於一省之中一軍之內亦必其是非不  
詭於正而後其政績少有可觀賞罰之任視乎權位有得有  
不得行至於維持是非之公則吾輩皆有不可辭之任顧亭林  
先生所稱匹夫與有責焉者也國藩若有江北之行則相去日  
遠音書日稀凡文武人士如閣下所見以爲是者望無惜時時  
開示如鄙人所見以爲是者亦當疏記奉告或先見爲是後見  
爲非亦可隨時互聞此閒去信州尙近不審能設法一來相見  
否彼中事如繁重則亦不欲奉挽也

與李希庵

僕與閣下兄弟俱係五人舍閒以溫甫弟之耗舉室哀慟旁皇

大書札卷七

五

不知何以爲計况尊府先有四月七月兩次之變更不知若何  
悲痛憂能傷人閣下此時不特爲鄂省軍民所倚重亦宜勉抑  
哀忱好自保愛以慰高堂千里之望收集潰軍重加整理使李  
家軍復能自固仍稱勁旅以雪迪公九泉之憤以安鄂省軍民  
之心穩紮黃州不赴下游不輕出堵剿不分兵調助他處以息  
湘人之氣以慰尊府宗族戚友之情待潤帥或鄙人至鄂事勢  
稍定閣下卽須回家一次戲綵堂前撫循孤姪尊府內外驚魂  
定後然後再議出處大計迪公殉節鄙人須縷晰具奏一次舍  
弟溫甫亦須附奏一片求將近狀詳細見示官帥前後各奏及  
潤公此次初出之奏均望抄示千萬千萬迪公近凡奏事幾次



尊處有稿否亦祈見示成敗論人古今同慨迪公用兵并無錯處今日之變設有議前此之失者祇可付之不論閣下仍宜照舊章辦理不必更改也

與方子白

舍弟溫甫往年在京與江岷樵袁漱六至交近年在軍與李希菴陳季牧及閣下至交今岷樵已逝如舍弟果有不諱之事尚望閣下與袁李陳三君各爲一文以志其生平至幸至幸希菴現在黃州正萬感交集之時可助以辦事之人甚少其樸厚忠純可與敘心者恐尤少也閣下素爲李家昆仲所欽仰尚望久與相依周旋不舍無遽念門閭而賦歸思至懇至幸

書札卷七

六

與郭雨三

弟以目光眇昏不克作小字雖至交密戚亦倩人代書來示洋洋數千言情文並茂弟不及遠矣舍弟溫甫熟於史事識解過人遽及於難痛悼何極閣下與筠仙漱六皆至親中之能文章者將來求大箸一篇表揚節義存沒均感世益多故蹤迹離合不可知尚望多惠玉音至以爲懇前案結後尤望迅寄一緘南河工程每年繪圖貼紅籤進呈弟在工部時曾取得一分比尚例進否自黃河北徙洪澤淤塞墾田局勢又變祈覓工繪南河全圖一分惠寄并將閣下經營之處簽明爲荷



張凱章觀察自邵武折回之時本意由甯都進剿贛南之賊目下改趨景鎮係弟移緩就急之計非張道初意也近聞甯國挫敗鄧軍門殉節皖南勢甚岌岌婺源及景德鎮賊勢甚張恐其內犯廣信復爲閩浙之患閣下全局在握想亦以景德鎮之行爲必不可少連城之賊如果日久不退將來張道仍可移師進剿聽候指麾耳

### 與李希庵

前此克復武昌九江爲令兄迪公不世之功克復湖口則迪公與楊彭三人之功而吾之隱憾得以稍紓者也現派凱章打景德鎮不僅保江西腹地實爲保全湖口起見若湖口復有疏虞

書札卷七

七

則不特僕與楊彭之氣不得伸卽迪公與塔羅亦憤鬱於地下矣二十六日拜發移剿景德鎮一摺二十八日接奉 寄諭言援皖之事亦詢及景德鎮茲并抄呈一覽將來國藩覆奏言敝軍當由景德鎮進顧彭湖以保九江之屏蔽大約開春後國藩亦當移駐饒州彭澤一帶先固南岸再議北岸目下卽不分兵赴鄂矣唐義訓久病兩月有奇屢瀕於危現尙不能行走該營亦非甚勁須大加訓練也欲爲迪公作一摺以表厚德望將近事詳細示我至要至要

### 覆左季高

潤公十三起行赴鄂楚皖人心得以鎮撫宜少安矣浚川一軍



尚在石城其弟啟淮病故其子積春回湘渠入營內又須另添  
兩營官營官之任本難其選蕭軍尤乏能者而士卒久病新瘥  
亦未果爲得力不特不宜分支卽全軍以行猶難深恃印渠部  
下有江忠義李明惠劉坤一諸賢必可大振不審尊意以之保  
湘省南路與以之助鄂省與湖口係弟飲憾之所亦卽胡楊彭  
及塔羅李苦心經營之所敵軍之勢將來恐終當與鄂中合而  
爲一目前則須先圖南岸如能打開景鎮保全彭湖屏蔽九江  
則於北岸亦可遙爲聲援比聞鄧臣若軍門陣亡宣州危急大  
江以南尤爲喫緊惟凱軍人數過少翔岡不樂歸其統轄吉左  
營亦殊散漫恐老湘營野戰則有餘攻堅或不足也聞賊果竄  
粵中吾鄉南路邊患方殷如何

書札卷七

八

### 覆左季高

惠緘敬悉一切迪庵之死何疑卽舍弟溫甫及篠石篁村龍臣  
懷軒諸人之死亦又何疑鄂中兩奏皆作不了語亦閱事不多  
之故戰敗而主將尚存不過半日卽喧傳兵眾螳附之矣李續  
燾紮大營後面歸路必經之地不告而先退趙克彰不救三河  
之難楊得武敗回不一詣希庵營次此皆可惡閣下謂我痛弟  
與迪爲不達此次殲我湘人殆逾六千焉得不痛又焉不惡彼  
背負者也國藩定於正月初旬移營饒州於彭澤湖口等處擇  
地駐紮意在保全湖口爲潯江兩岸聲援如潤帥希菴之意欲



弟移駐北岸亦甚易耳徐州歸德曹縣失守確否捻匪氣燄曰壯論者以爲禍烈於洪楊山東河南兩省大府不講吏治從亂之民日多來示欲弟講求馬隊誠爲要指此事弟夙來究心楚人柔脆不耐勞恐終不濟南馬亦弱小遠不及河北口北論人馬耐苦終以內外扎薩克爲優東三省則以吉林黑龍江爲優陪京人材近稍浮滑好利習俗易矣吾楚水陸諸軍士卒多不耐苦大是短處將帥亦皆煦煦愛人少英斷肅殺之氣來書謂羅李晚節皆失之寬正不獨羅李爲然也乾鎮河溪等處如有好兵吾欲調千人練之不須統將祇須千把數員分帶之抬鎗烏鎗揀得快而有準無論或南或北或山或野終是可靠吳翔岡在金瓶嶺所操鎗手現在存者無幾皆已分投各軍若操練千兵則無分散之慮陳德園一起係勝帥所調終當索去未便竭吾力操練此起耳

### 與李竹溆

弟近狀他無所苦惟目疾日深燈下不復能作字三河之變尤用愴懷早歲有志著述自馳驅戎馬此念久廢然亦不敢遂置詩書於不問也每日稍閑則取班馬韓歐諸家文舊日所酷好者一溫習之用此以養吾心而凝吾神謹告一慰不宣

### 致官中堂

旬日累接溥湖來信知都鮑疊獲大捷陳逆不敢上犯蓋籌密



布大局危而復安曷勝佩服接和帥咨言陳玉成打通安慶  
太悉力上竄茲特咨達冰案或是宿松未經接仗以前之計比  
聞江蘇之徐州河南之歸德山東之曹縣先後失陷搶匪大隊  
當已北竄鄂中得趁此時選將操兵方圖自固卽再來擾犯亦  
無患矣國藩擬於新正初旬移營饒州擇駐湖口彭澤等處先  
固南岸屏蔽九江如果江北警急俟與台端商定渡江移紮亦  
極易耳湖南前奏一摺奉 旨令弟斟酌復奏卽日當以鄙意  
疏陳未審卓裁以爲何如

與胡宮保

和帥來咨言陳玉成意圖上竄近有初七之捷逆謀或當少緩

書札卷七

十

公與希庵趁此兩月簡汰訓練明春當可禦大敵也湖北鄖陽  
鎮標之兵尙有可挑選操練者否湘勇大者須咨部補實缺小  
者亦可補鄂省千把外委缺鄂兵之佳者亦可令其與湘勇會  
爲一氣在湘勇則多方維繫在鄂兵則暗地轉移或亦一道與

與吳翔岡

前此面論高明平實二義張楊園先生嘗言之矣大抵莅事以  
明字爲第一要義明有二曰高明曰精明同一境而登山者獨  
見其遠乘城者獨覺其曠此高明之說也同一物而臆度者不  
如權衡之審目巧者不如尺度之確此精明之說也凡高明者  
欲降心抑志以遽趨於平實頗不易易若能事事求精輕重長



短一絲不差則漸實矣能實則漸平矣輒貢區區以備采擇

### 覆胡宮保

接奉惠書敬悉迪公與筱石忠骸均已尋得大快大快溫甫舍弟遺蛻荷蒙希庵親家多方購覓不惜重貲感謝曷勝惟無人認識終恐難辨茲派楊名聲楊鎮南張吟三人并朱副將營內之白賊中來投者二人前往尋覓敬求希庵親家致書霍山王令務祈購一妙線帶此五人中之一二親赴三河故壘尋認以期必得至感至感聞都鮑近有三路進剿之說此時祇可自守難期進取尙祈宮保前輩嚴緘止之江北軍務非數千馬隊不爲功頃與李少荃議可調察哈爾馬三千匹由上駟院派員押

書札卷七

十一

解來鄂而亳州一帶善馬之勇可募名曰馬勇現在德勝二帥亦係調口北之馬募淮南之勇將來馬隊斷非我湘人所能擅長自不能不照此辦理吉林黑龍江馬隊聞已通飭止調矣宮保似可商之揆帥奏調察哈爾收厰馬三千匹來鄂國藩亦擬令少荃募馬勇千人試行操練也

再調察哈爾馬匹之事似不可緩正初入奏三月底馬可至鄂分配教練五月可以集事若明年春閒陳玉成不上犯鄂垣無警得以其暇悉心講求國藩任教練之責舒多任戰陣之責夏秋之閒馬隊成後則氣勢日壯不虞其上犯武漢矣三千匹不可再少以二千匹操新馬隊與舒多舊隊相輔以千匹游牧於



黃德等處以備添換之用大抵北岸兵三萬南岸一萬水師一萬皆不可少也是否仍求訓示

### 覆胡宮保

頃接黃州惠書敬悉將有宿松之行前得希庵書將以正月送迪公靈柩回湘如希庵不果遽行公往宿松信宿卽返尚無不可若希果速行則公似不宜離黃而入皖蓋石牌潛太之賊眈眈上窺未嘗一日忘武漢若公以數千勁卒守黃州而水師守江守漢則雖二十萬賊上犯而武漢黃三城尙有可以保全之理若公赴宿松往返兼旬之際適值宿太等賊邂逅有變則我公進退兩難黃州防兵亦不免於搖動特此飛商大旆似宜穩據黃州教練水陸深固不搖下游縱有疏虞武漢黃三城自岳峙也

閱書札卷七

十一

### 與張凱章

足下用兵詳慎不苟欣慰之至探看地勢是第一要義旗長中有善看者否若無好手須足下親自查看乃可放心不宜信土人之一言以爲依據景德鎮如能得手似須赴婺源會剿一次亦望預將路徑探明能將此二處股匪剿除則我軍可出江邊與水師會合兩湖易於通氣耳

### 與駱籥門中丞

聞擒匪馬隊多而且悍左季翁前函商及辦馬隊一節侍比致



書胡濶自請其奏調察哈爾牧廠馬三千匹由上駟院派員押解來鄂亳州一帶有善騎之勇募名曰馬勇若鄂中添新馬隊二千與多舒之舊馬隊相輔而行侍若移駐潯湖等處亦可分任教練之責剩馬千匹游牧於黃德等屬以備添換之用未審秀濶二帥以爲何如敵處親軍現操步箭後手僅齊乳與馬射相似亦能及遠三十六弓四十弓不等利於刀矛而捷於鎗礮似亦可以打仗擬調兵五百招勇五百合成千人爲步箭營另備公牘咨達冰案伏乞允准速行爲荷若兵丁中弓箭手尙多能調六七百兵則招勇較少教練更易景德鎮之賊聞馬隊亦頗不少吳翔岡之挫卽係爲賊馬所乘用兵過久賊匪愈打愈狡而官軍技能不見日進茲可慮耳

書札卷七

七

### 與左季高

翔岡在建昌時已不願隨凱章至景德鎮強而後行吾意其雪萬年之恥報隱震之仇必且慎重好謀以求一當不料甫到尙未安營輕於一決又致挫失來稟歸咎凱章仍是客氣用事鈴峯亦與凱章斷斷不合凱僅二千餘人景鎮賊尙堅悍未知能得手否南安失後吾鄉桂東一帶防兵不審何人統領印渠一軍味根不願來江西此時江事一日不靖卽吾楚一日不安祈兒婉告劉江或來撫建或援南贛總須楚勇一軍東來江西乃不重遭蹂躪國藩乃不過嫌單寡也鄂省事非馬隊不濟誠如



尊見若能保得春夏則七月以後新馬隊或可練成南岸曹劉兩軍終難深恃若凱章不能克復景鎮則下游之賊尚虞其窺伺湖口不特江鄂同震亦水師切膚之患也諸祈碩畫通籌見示爲荷

與耆九峰中丞

饒梅臣廷選以告病請假經王春崖制軍奏參鬱鬱不自得病勢亦頗不輕半由肝氣抑鬱所致渠曾奉旨發敝處調遣目下需才甚急饒鎮置之閒散可惜弟意欲奏調來江西或令到贛州本任或於甯都建昌各屬擇要駐紮以防閩賊大股擬會列尊銜入告可否祈示蕭軍至贛州後恐閩賊仍入瑞金石

書札卷七

十四

城等處則浚川與弟處老營中間梗絕不能來建昌請餉若果阻隔尚求尊處暫爲照應接濟撫建兩府恐明歲不能無警似須由老兄早爲諄飭令地方官預講城守事宜儲備米鹽子藥各籌兵勇三千內外預爲堅守之計有備無患能令廣撫建三府深固不搖則全局皆振是否有當敬求復示

與張凱章

第五旗紮牛角嶺其勢頗孤不知可保萬全否若不放心則宜收合紮一處目下賊氛正盛我軍宜蓄銳以俟時沈幾以觀變如必須退兵則不妨少退以蓄勢待得機然後再進兵法有進有退古名將非全無退時也望斟酌行之建昌之三千人若全



赴景德鎮亦可助閣下一臂之力是否應添此支生力軍望飛  
速示知危急之際尤以和衷爲要

與王鈐峰

崖角嶺一冲太長進冲甚易退回甚難此行兵者所忌也此時  
審幾度勢但宜穩紮不宜輕進名將以救敗爲第一難事十九  
日之挫足下救應都有條理望更休養整頓常葆銳氣建昌老  
營之三千人如須調赴景德鎮助剿不過二十前可趕到乞速  
示

與吳翔岡

二十九日批發來牘後除夕接王鈐峰稟知凱章十九日實已

書札卷七

五

約會出隊批詞皆從德性上箴砭不過借軍事發端語雖切直  
亮智者能受盡言也貴軍旣與張王合紮一處仍望暫不撤動  
待凌委員到日由足下相機妥辦

與歐陽小岑

弟年來在軍亦未廢學惟爲文絕少聞作奏疏書牘放筆爲之  
都不稱意每念老境浸尋百無一就中夕增歛哲嗣之取法尙  
正余咸豐三年相見時不知其所詣若此惜未與之曾敘拙著  
此序蓋深憫後起者之不可多覩便中請寄南屏先生一閱以  
爲何如

與劉養素



軍事偶有挫損志氣決不可餒望仍堅持定力待春水方生礮  
船上駛則澠池再奮矣凱章處務祈時時聯絡不可蠻攻堅壘  
恐傷精銳

致左季高

臘月下旬奉達一緘久未接來書不審吾湘近事如何南安失  
守崇義繼陷郴州防堵最爲喫緊又聞廣西柳州平樂先後不  
守蔣軍難振寶永戒嚴各省仗吾湘爲根本而吾湘應接不暇  
計印渠尚未到家而南路已警報紛紛矣比印渠已募勇再出  
否子春之軍練成否此間軍事浚川白石城拔營馳赴贛州聞  
在粵都慶歲新正尙無來信南贛賊勢蔓延非浚川一軍所能

書札卷七

六

了景德鎮賊多而悍十九日吳翔岡小挫一次陣亡百人吉左  
副湘營務處共亡五十八人二十七日凱章大勝一次殺賊近  
千此路或可穩紮然賊狡壘堅猝未易拔也翔岡與凱章積不  
相能鈴峰亦與凱斷斷弟敬凱之精細穩重不能不抑翔岡渠  
請撤一稟已嚴批切責之派凌蔭庭往領其眾凌非果能治軍  
姑取其能服凱章調度而已意城人瑞不在此弟於下情不甚  
悉寬嚴未能恰當望閣下催二人速來至要至要翔岡之意趣  
似甚佩仰子春將來若回籍或令與子春共事敝處折其客氣  
閣下假以羽毛終可望成韓器也調察哈爾馬三千匹不知鄂  
中已入奏否弟擬將大局入奏言皖北皖南及中流水師三路



進剿事拜摺後卽當移駐湖口等處張凱章一軍尙不足以當  
江西北路之防兵若進剿皖南則單而又單此軍精銳可愛不  
忍多用其鋒以致利折景德鎮堅壘屢戒其不可蠻攻將來擬  
調蕭浚川一軍歸併北路與凱章或先或後或正或輔吾鄉南  
路若得印渠另整一軍子春新成一軍一面防堵湘境一面助  
剿江西則蕭軍調歸北路乃可放心彭山峒歸調兵六百萬  
託閣下玉成若能操成鎗礮較之用勇更有把握潤帥處弟亦  
勸其操兵耳貴州四川近狀何如便中尙乞示及

致郭意城

自閣下去後鄙懷亦用鬱鬱蕭軍病卒愈後白石城拔營赴贛

書札卷七

七

當在雩都度歲南安失守崇義定南繼陷賊蹤蔓延蕭軍旣難  
兼顧又去建昌太遠音問難通轉運不便軍餉子藥須由省城  
水路解至贛州動逾月餘調度焉能靈通張軍至景德鎮賊多  
而悍僞壘太堅虞不易拔翔岡與凱章不合鈴峰亦齟齬翔岡  
告病稟撤已批准撤回派凌蔭庭代之若使閣下與人樹在此  
或別有調停之法然翔岡但服子春不服凱章終難相安耳義  
營於除夕退紮隄口地方在凱營後四十里凌蔭庭到後恐尙  
須改換隊目挑補缺額目下曾不能爲凱章助一臂之力深用  
懸系惟望閣下與人樹及舍弟沅甫三人速來則足以慰凱章  
之心而通老湘營之氣見示各條一一敬悉以至交而兼姻戚



尚不肖面進箴規欲吐還茹豈吾固拒人千里耶愧甚昌黎所謂中朝大官老於事詎肖感激徒媿媿吾非大官亦漸老於事鋒鋌鈍矣近有謂宜速拔營赴湖口者有謂宜少留建昌者紛紛不能決殊自愧慙祇望閣下來此一決耳

與張凱章

聞景德鎮無小菜可買甚爲懸系子藥等項尙足用否望三日寄信一次以便隨時解運平江三營到時萬望視同一體將來可助貴軍一臂之力鈐峰於十九小挫之後辦理井井有條二十七日軍威重振想閣下和衷濟美近日士氣益旺矣

與張凱章

書札卷七

七

聞劉養素兄一軍近與閣下聯絡一氣甚慰甚慰樂平團練究竟可用否凡兵勇太少則軍威不壯太多則弱者閒或反爲强者之累弟之不肖輕用團勇亦執是故若能借其人多以助我之勢而臨陣又不爲其所累則有益而無損到處鄉團皆可用矣閣下向來最善聯絡鄉團此次樂平紳耆有公正幹練者否便中所示及

與王鈐峰

國藩平日不善臨陣故友人相戒但宜在遠處調度不宜至近處對敵恐各統領營官分心以護衛鄙人轉不能衝鋒應變出奇制勝也閣下來緘亦似微寓此意與敝處幕友之見相同然



閣下與凱章所部合計不過四千以禦大敵實嫌單薄幸兩君  
慎密可無他虞將來攻克景鎮再圖前進終當另撥二三千人  
隨同征剿以壯軍勢耳

與吳子序

去歲相會戲語日久不見賈生自謂過之今不及也頃讀大箬  
釋愛篇彌覺不及遠甚莊生之恢詭恣睢自以爲羊棗我所獨  
嗜不意老兄又竊嘗禁嚮茲可妬耳弟亦久思作自序一首見  
此尤用技癢少遲當勉成奉和揚爲解嘲而班擬之班作幽通  
而張學之感閣下之反脣相嘲固不可以無報也

致左季高

書札卷七

九

弟駐建昌若使閩賊回竄廣昌石城等處而不能撥兵禦之則  
氣象亦覺窮窶現在護衛之朱唐兩營及吉中營似尙可以一  
戰畱在身邊閑殺勁旅亦殊可惜現今諭吉三余星煥等新招  
千人并彭山岷之六百兵爲護衛之用抽出朱唐兩營吉中營  
緩急出外防剿或歸併凱章部下以厚兵力是否有當專以奉  
商祈速示諭吉三才不如劉培元而無他嗜好志亦躍躍欲試  
余星煥頗聰明才足以長五百人到長沙時尙乞誘掖而裁或  
之潤帥近日汲汲求統領之才就弟詢訪愧無以應王夜村足  
統領五千人否如其可也則或令朱唐諭余及副湘吉左等概  
歸校村爲一部則不似散錢無貫印渠部下江劉李三賢將潤



帥寤寐思之意欲閣下以印軍隸鄂垣目下吾鄉南路喫緊印軍可北行否楚勇束伍之法須略改變鄙人前制八隊爲一哨內刀矛四隊鳥鎗二隊每隊合隊長火勇爲十二人抬鎗二隊合隊長火勇爲四人似亦可操厥後閣下製劈山礮爲陸軍利器似不能不另立劈山礮哨官而以小鎗刀矛護之比來叔孫生所定楚勇營制何如便中開單見示爲荷頃附片調筠仙回南蓋因科場巨案恐其分校禮闈或嬰世網也

### 覆胡宮保

新正二日展誦惠緘知歲杪有二郎河之行又承賜示祭迪庵中丞文字挾飛鳴之勢而筆含哀憤之聲讀之令人增友朋之重迪公真不死矣不審他日鄙人能得此於先生否此不可不預爲要約也初十日又得元日賜緘并讀迪公優卹諭旨可歌可泣尙復何憾三函所論各事謹一一詳復如左

書札卷七

三

一閣下不居署中與希菴相處寸步不離公義私情兩爲曲盡然希菴將來不能不率師入皖不能不一攻舒桐三河以雪湘人之恥而抒迪公之憤閣下似宜久駐黃州可伸可縮可外圖皖省可內保腹地上游可籌餉可察吏下游可督潛太進剿之師可顧二蘄防守之兵似覺面面俱到若台旆一人皖境則於籌餉察吏等事不甚靈通鄙意春夏閒希菴與閣下似可堅駐黃州如新馬隊能練成希菴進剿皖中閣下可一至下游視師



時往時返仍開府黃州長爲老營常添練新兵新勇接濟前敵更換洶汰如蕭相關中故事則爲益極大芻蕘之獻不審有當否

一都鮑欲兩路進剿自是正辦我進則賊自守不暇賊進則我亦自守不暇一消一長斷無中立之理惟目下毛羽不豐兩路俱須馬隊現僅馬千餘匹不敷分布且一入皖境卽無歇手之時希菴如須回湘一行不如待其假旋再行進兵氣更充足

一湖口彭澤總須一枝精兵乃可保全此不特爲侍鬱悒之所亦塔羅李三君九泉所必爭且楊彭及諸將士亦不可再有此疏失也守湖口之賊首黃文金今尚在蕪太等處必不能忘情

書札卷七

五

於此景德鎮若能克復擬以凱章當此一路庶足禦之劉傑人李寶賢劉連捷黃澤遠皆好營官惜無好手統領之寶營則風氣日壞難期得力矣

一季公似不宜赴鄂目下湘中亦多事東防南安之賊南防廣西之賊西防黔中之賊必家鄉平安無事而後湘勇之在江在鄂者無內顧之憂來示謂全軍而後能保楚保楚而後能圖吳吾謂固湘而後能全軍心也印渠及其三將除江西外剿湘剿鄂皆其所願征皖北尤所甚願但目下須防寶永一帶不知此軍能遠出否侍已緘詢季公矣楚勇東伍太不講往曾與岷樵言之去冬又爲印渠言之頃季公書來已另立規模爲之編束



一來示畱意統將之才此卻極難前此所得諸名將皆邂逅遇之非求而得之也近來長千人長五百人者容可物色或無其才而徐徐操習以幾獨統領則必天生是才非學所能幾王枚村不知能統一路否希菴嘗稱之頃亦緘詢季高矣李筱泉之弟少荃名鴻章丁未編修其才與氣似可統一軍擬令其招淮南之勇操練馬隊渠久客呂鶴翁處福元翁處閱事過多不敢輕於任事刻尙未相許也意城內耿介而外圓和論事觀人俱有識卻是吾鄉一把好手幼丹與本省上下官多齟齬深虞其憂悶致疾建昌王太守明決有才此三人合之次青均濟時之良器然皆不宜於統軍名將難得寤寐求之

書札卷七

五

一西丹似可不調調千人亦太少無益大局也鹿角禦馬是古法京營漢軍專有一項昇鹿角兵然亦似鄙人初講水師時以魚網牛皮擋礮子耳真能戰者決不事此也待決計另練新馬隊更不講求他法雖岳公之麻軋刀亦倖而偶勝耳

以上各條謹就垂商處奉答仍求詳示

與沈幼丹

頃見筱泉寄少荃書知玉體不甚和適世方多故珍重有用之身以磨艱大之寄慎勿悶損以斲天和國藩亦鬱塞有年胸次過榻竊欲以自砭者共砭耳

致駱中丞



凱章一軍雖屬勁旅總嫌其單若減去吳國佐之千三百人則尤單弱茲擬令喻吉三奈星煥黃思學合招千人與彭山岷之六百兵丁畱老營護衛抽出朱唐及吉字等營出外打仗或併隸凱章或另打一路則浚川雖遠隔南贛尚不至過形單薄此項餉銀擬就江西耆中丞商撥另行咨達冰案通籌全局一疏是否有當尚乞指示

### 覆劉霞仙

粵匪去冬未平且復加厲所睹四書當以奉詒閣下向多愁鬱想書到君家亦百年中可爲開口而笑之一日也三河之敗殲我湘人殆近六千不特大局顛壞而吾邑士氣亦爲不揚未知

書札卷七

三

此後尙能少振否國藩此次在外無不答之信無不批之稟官場慶弔酌量送禮家鄉慶弔親族本家亦少爲點綴餘皆率往常規模不變巧言令色足恭三者有志學步質旣魯鈍學又作輟數月以來豪無效驗或勸先難後獲宜再卑抑以俟大效僕則抱七必不堪仍將修吾初服免使陳咸頭觸屏風耳筠仙在京亦所如不合頃附片奏請來營大約三四月可以到營閣下能來再賦會合否

### 與張筱浦中丞

景德鎮之賊與婺源賊黨相爲犄角一處得手則處處可期并下惟匪黨尙多負隅已久恐難遽克若能將兩處之賊逐出江



濱敵軍得與雄麾合勢事機當少順手

### 致彭雪琴

景德鎮一軍出隊進剿互有勝負聞賊將大舉繞抄我軍後路逆氛正熾官軍屢挫如抄樂平後路斷我接濟則凱章甚爲可危設有意外之虞則賊必圍逼撫州并犯建昌蕭軍遠在贛南不能遽歸敵處老營人數僅止三千不敷攻守望閣下迅派得力水營一營卽來撫州以備防守若建昌有事亦可就近調來并求派好礮手十餘人羣子藥筒以備教訓此間兵勇放礮守城因路途太遠故預爲奉告以備不虞卽不另具公牘

### 致左季高

書札卷七

三

凱章臘月廿七之捷得其續稟亦損百人打仗不怕敗挫祇怕傷亡太多自去臘以來我軍傷損不少士氣稍沮此間老營太單勢不能撥往濟師蕭軍甫至贛南不可遽調望閣下速催王枚村來江或酌帶數百人維持凱鈐一軍并請催彭山岷之兵奈星煥之勇星速前來護衛老營抽出朱唐兩營歸併凱章麾下則生力漸多而氣勢仍壯矣

### 與李筱泉

凱章分紮牛角嶺之第五旗去老營幾二十里僕曾囑其移紮一處凱復信以弁勇可靠未移也十一夜第五旗營盤被陷聞賊將抄出樂平截我後路凱軍殊可危慮此間老營火藥已罄



望稟知中丞趕解萬勛或由旱路送武陽渡登舟解來此間派夫於水淺處迎接火毬及大礮之羣子皆所急需望星速解來餉銀則起早解來至要至要養素凱章兩軍若俱不得力則賊當窺伺撫建此次未及函告中丞恐涉張皇也

致駱中丞

此次添兵勇共三千餘人待其到時目下先抽老營二千人赴景德鎮助剿將來須另派統領別爲一支庶到處可爲犄角之勢卽如此次若另有一支紮東路以防浮梁之賊則凱章一軍當早得手矣現向耆中丞處索餉事之諧否尙未可知然不得不放手一辦也

書札卷七

與胡宮保

敝處因凱章一軍未甚得手又添募兵勇三千餘人向江西索餉不知諧否添營甚易得統領之才千難萬難此間日與酬對者僅有護衛之三千人及本府之官紳數人見聞太陋殊悶人也莊子云以天下爲之籠則雀無所逃閣下以一省爲籠又網羅鄰封賢俊尙有乏才之嘆鄙人僅以營盤爲籠則雀且遠引高翔矣吳翔岡與凱章意見不合已批准撤營此君志氣高邁而辦事不甚平實吾意擬令還湘助黃子春一軍將來或有成也

致官中堂



尊處去臘迪菴請卹摺及舍弟等一摺一單想已咨送敝處不  
知中途何處沈滯臘尾奉到 恩旨亦望速咨以便具摺謝  
恩至懇至懇明銷之在湖北者敬求閣下擇尤拔補實缺數人  
是亦獎勵士氣之結人心之一道卽保至都守者或借補千把  
亦可稍資策厲目下敝邑出來投効者少似宜多方鼓舞是否  
有當

與耆九峰中丞

此次敝處招兵勇三千餘人散援兩湖之例更向台端增索萬  
餘金合成三萬之數如蒙惠允卽求尊處便中附片一奏曷勝  
銜感弟往年在軍不通慶弔應酬而私分之窮窘如故不肖添

書札卷七

美

募兵勇而公分之欠餉如故此次擬略改局面放手一辦如其  
得手此時多添數千將來速了數月此時多添一軍將來速了  
半年亦未可知細觀賊勢皖南醜類尙多不窺江西卽伺浙江  
若內竄江西固須預籌重兵併力剿洗卽東竄浙境亦須閣下  
籌兵往援敝處添兵與尊處添兵名目少異而所剿則同一賊  
也是否有當祇候玉示至撫建兩府膏腴之地東而連城之賊  
北而婺源景鎮之賊難保不萌意竄擾現與建昌王太守講求  
城守之法城池頗堅礮位亦好惟子藥缺少敬求飭局多解爲  
荷



行軍以能攻城略地剿滅大股者爲上防守保民者次之此軍  
現在建昌爲官民所愛尙屬次等好兵若遽去以踐潯湖之約  
旣失此地之民心又不能順道以助攻景鎮之賊則近於取巧  
是以暫畱此閒以順輿情至此閒不克有爲終須北行以與水  
師合勢則僕固未嘗一日忘之也

### 覆袁漱六

此閒軍事平平張凱章一軍向稱健者比剿景鎮將近兩月尙  
未得手蕭浚川進援南贛亦無捷音南北相距千餘里僕居建  
昌雖尙適中然兩頭各隔五六百里調度均不靈通六舍弟溫  
甫遺骸久未尋得春雨泥濘此後更無覓處思之至痛拙作哀

書札卷七

七

辭一首鈔呈一覽敬求大作墓表一首光及泉壤國藩之與閣  
下締交而申以昏姻由溫甫弟先之也屢得家信託庇平善惟  
家叔痛傷溫甫少遺末疾近於偏枯聞閣下買書極多吳市爲  
之一空可否開列書目寄示俾得一廓見聞趙靜山中丞聞其  
澆樸愛民近日何以引疾不出何根雲制軍位望正隆近聞亦  
有憂讒畏譏之意果否吳中大小良吏與閣下最稱莫逆者何  
人使中均祈惠示

### 致郭雨三

聞新歲當過江見何制軍前事當可化堆垛爲煙雲際此世亂  
事會紛繁是非淆舛能陞伏不出自是大幸惟夙昔知好未免



代增鬱伊能藉大力者一爲申理雖不遽光復舊物但令公道  
大白亦自差強人意漱六骭髀之姿本亦不諧於俗而近年稍  
覺亨通廣購書籍兼濟親舊漸欲潤澤豐美孰謂措大遂無稱  
意時耶袁浦近日風氣聞尙浮滑近利閣下處彼計亦非甚相  
宜下河民風較樸當與大君子臭味多洽也鹽務河務中大小  
官員親家與之共事多年其中縞紵最契者何人識略最優可  
任艱巨者何人便中敬乞示知一二弟身體如常惟目疾久不  
痊愈癱疾亦糾纏不去十五年舊恙亦無意復治之也李迪菴  
三河之挫敝邑陣亡者近六千人士氣大傷未知此後湘勇尙  
能自振否景鎮賊氛尙旺若能擊退則敝軍當由大江南岸勉  
圖進取近與張小翁合勢遠與江北諸軍爲援昨發一摺抄呈  
台覽未知有當萬一否

### 與劉養素

貴軍與凱軍相離甚遠若合紮一處恐無此妥善之地且東西  
兩路皆不可不防合紮之說自無庸議現在凱章處添調平江  
兩營當可少壯軍威東路之聲威一振則賊匪不敢專力以撲  
閣下西路之軍此一定之勢也弟爲此間所挽留業已應允不  
便遽動且敝軍一動閩賊西犯撫建亦殊可危貴軍之事日日  
懸系苦無好兵可以撥助目下春水方生麾下水師敷用否如  
尙須添船可調湖口水師往助信息太稀望常常惠音爲要



致劉星房

珂鄉雖一例蹂躪而南城較之南豐猶爲彼善於此自去冬招集流亡復業者多城市之中頗有熙來穰往氣象閣下小住此閒而令世兄時還南豐照料田產講求耕耘不過半歲即可蘇息休養漸還舊觀積善之家簪纓之族偶有蹉跌未遽窮困也但求江閩交界常得一枝勁兵駐紮則建郡長無他虞耳弟在此閒豪無功效亦非可久之局但願台從早歸鬯敘一切不勝慰仰

致張小浦中丞

聞婺源大獲勝仗遠道傳聞不知確否景德鎮之師張凱章分

書札卷七

完

派一旗於牛角嶺救應不及被賊攻撲旋派兩旗扼紫原處添調廣豐之平江兩營往濟業已到防尙屬平穩養素因兵單賊狡欲恃老營移赴饒州前因建昌官紳挽留業經面允此際自難遽動張觀察軍旣稍振賊亦不敢以全力西犯養素也婺源若果速下李江諸軍作何調度敬祈先行示悉聞平江兩營之赴景鎮者自嫌單薄又經稟請幼丹續調玉山之平江營不知果否玉山關係三省防務亦係要區未可過薄也

與史士良

弟身體幸託平善惟目光眇昏益甚去冬附片請假一月刻下閉目靜攝亦無成效每寫字數行停筆多次燈下則一無所營



幸此閒軍務不緊酬應亦稀諸堪藏拙蕭張兩軍若共剿一路互相掎角或易得手現在一南一北彼此均嫌其單弟擬俟南贛稍靖卽調蕭軍歸併北路添募兵勇放手一辦若其順利則裨益較速已草疏入奏不審卓見以謂何如

### 與李筱泉

此次招勇五百但試淮南勇之果能操習馬隊否耳不特少荃不敢自信卽僕亦茫無把握也當年辦水師亦係冒昧試之厥後楊彭諸人徐徐成簡章片亦初願所不及賢昆仲不必遽以任事之難爲慮

### 覆胡宮保

書札卷七

三

專丁到接奉惠書得知舍弟溫甫遺蛻仰仗大力業經尋獲閣家世世永感厚澤舍溫弟亦九原銜感結草圖報矣先軫喪元又幸事中之一大不幸然少得歸骨慰情聊勝所有棺斂之具歸舟之資敬求閣下與希菴親家妥爲照料仍求開單示悉以便寄呈此事與他事殊未敢以累高誼祈亮之也楊名聲楊鎮南張吟三弁祈卽飭令妥送靈櫬回至湘鄉霍山王明府處劉步瀛處共用去銀若干弁求查明示知以便速寄

### 與楊名聲等三弁

接來稟知舍弟溫甫遺骸業經尋得三位辛苦跋涉爲功甚大感謝感謝比來亮至黃州矣棺斂之資歸舟之用胡宮保與李



觀察必加意照料三位中卽派楊名聲楊鎮南送靈櫬至湘鄉舍開張吟先回建昌銷差以便面詢一切也長江大湖風波之險務望小心慎重晚閒擇地灣泊求宮保派礮船護送情願多走幾天不必冒險一步到湘潭時先專人至舍閒問明由何路歸去爲囑

致季君梅

弟此次出山尤乏裨補所部楚軍由兩湖江西給餉較昔年差爲充裕而不敷之款每月尚在三萬內外比在江西分一軍援南贛一軍剿景德鎮相去千有餘里擬俟南路稍靖卽當歸併北路圖清皖南棉力薄材久無寸效時歎於懷賤體猶適惟目光眊昏作字不過三四行輒須停筆少息心血積虧宵無佳寐以是兢兢恆虞失墜如天之福逆燄日熿兩江早克告成太學鄙人亦得戢景窮山藉藏鈍拙不貽師門之羞則差幸耳

與朱伯韓

近讀大集數卷鴻文較之昔歲在京似更雄深國藩在軍數年未敢廢學惟詩古文蕪廢日久又以公牘文字所累手挽浮滑去古彌遠用爲內疚何時瞻對得聆至論一開鄙鈍慰甚企甚

覆左季高

一凱章一軍自正月十一日後并未開仗所調廣豐之平江兩營千三百餘人業於十六日到防凱鈴待之甚厚平江營亦樂



隸麾下也續調之玉山平江營弋陽祥字營共千三百人亦正月可以到防但願江北之賊不更南渡凱軍應可保全

一浚川因信豐事鬆進赴南康正月十八在新城墟大獲勝仗奪偽印至四十二顆旗至五百零四面可謂大捷惟聞賊數實有五六萬石達開尚在南安一帶弟去年奏石逆不在此股將來不免矛盾浚川似未稟駱帥卽飭承據稟速咨南安一帶處處與湖南相通不能不一一咨明俾尊處得以料理凱軍各仗亦一一咨明以憑查核翔岡請撤各稟亦一一咨明

一翔岡稟請撤歸各情前緘曾略及之翔之倔強似足有爲如十九日敗後稟撤情詞迫切除夕移營三十里不顧掣動大隊

書札卷七

三

又似全無道理近日交卸之際亦似不曉事者此間自意城人樹歸後於各營情意不能通知舍弟沅甫於凱章極相得本可來此以達難顯之情因家嚴改葬之事不可不急圖溫甫歸葬亦須沅甫料理故不克遽來望閣下催人樹意城速來謀所以維持凱鈐一軍者於弟大有裨益卽於江西湖北亦關係不小也

一蔭渠部下三傑峴莊吾未得見味根孚吾則非湘軍諸營官所及不特弟思致之卽潤帥亦求之若渴石逆既有窺楚之說吾鄉南路自非劉培元所可了計印渠此時必已成軍再出恐草草編伍不暇訓練卽須往防郴桂一路楚勇若能約束訓練



一番其耐勞遠勝湘勇岷樵之餘韻當更長於羅李諸公也若復草草而出雖不甚滿人意正自足當一路求閣下先置郴桂吉安等處將來歸併潯湖但在大江兩岸則隸敝處隸潤處一而二二而一耳去年江西保印渠考語平淡若須早爲之所則請由顛帥主稿掣列賤銜多一次奏保於印渠非有所加或放一實缺亦爲時得一好官

一新年屢接鄂信卻未提及七罪魁事欲湘勇之再振誠不可無以威之然屢勝之餘極盛之後恐亦如古人所稱再實之木其根必傷比來湘人應募者少卽營官幫辦亦多倦遊不知尙能支撐幾年否

書札卷七

三

一勝克齋未聞其病見其近日一疏極陳皖北事不可爲大約兩淮羣盜中原之禍未已閣下去年囑弟畱心馬隊弟以調察哈爾之馬練淮南之勇入奏頃得潤公信言牧廠官馬決不可用前奏又無當矣辦馬尙易騎將難得閣下所賞之田興恕可改一騎將否此外無聞也

與孫芝房

上年十一月作舍弟溫甫哀辭一首茲抄呈法鑒維時遺骸未獲悲傷彌切頃得胡中丞信知舍弟尙得歸骨而先軫喪元尤增永慟擬再自爲墓誌一首以抒私哀敬求閣下作墓表一篇俾舍弟得挂名大集國藩亦與有榮施



與劉印渠

凱章在景德鎮屢次小挫臘月雖獲勝仗亦傷百餘人弟本欲調閣下來助凱章特以南路喫緊蕭軍不克獨了故思閣下與蕭軍夾擊而調王枚村來助凱章若湖南另有人往南路則閣下來北路更妙也

覆胡宮保

一蕭浚川於正月十八日在南康之新城墟打一勝仗奪偽印四十二顆旗幟五百餘件之多二十日打一敗仗陣亡二百六十四人此股匪黨如張遂謀傅忠信賴裕新黃玉發向所共知者皆在其內聞翼逆亦實尚在此人數多至七八萬恐非蕭軍

書札卷七

語

所能了湖南防界者爲劉培元彭定太亦不足以當之而上猶崇義土匪甚多將來不犯吉贛則爲吾省之害劉印渠部下之三將已緘商季公令先防南路與蕭軍夾攻暫不能來北路將來或由吉安北下潯湖當令其過江當皖北三路之一耳

一凱章又小挫一次看來此軍殆不可保完侍擬移駐撫州凱如站得住則侍當添兵濟之如站不住則侍駐守撫州與南昌省城相犄角俾南北之賊不得聯合一片亦有小補

一奏調西丹之事請官揆帥與閣下主稿掣列敝銜上駟院等衙門習氣之壞在京時亦頗有所聞今旣由鄂省備價赴口買馬則諸事皆得實用侍已令李少泉專人至淮上招募馬勇五



百人待其到時試行操演未必能與西丹高駕要當差勝於江以南之人耳

### 覆李希菴

蒙派朱蔡七與劉步瀛往尋舍弟溫甫遺骸果得歸骨家山閣家感荷大德曷其有極比想已自鄂南旋矣稍緩進剿之議僕於潤帥緘內已屢次言之不知近日定議如何卽閣下入皖亦似須有馬隊輔之以行潤公言三河之失非關我軍無馬事或良然然擒匪馬多倘挾全力來撲我湘軍步隊終恐其爲賊所眩也承囑爲潤帥所作祭文稍加參訂潤帥前緘亦以見囑曰內因蕭張南北兩軍俱不得手心緒不佳尙未能靜心核校容當如命參酌又擬作迪公墓表溫甫墓志尙未動手江忠烈神道碑羅忠節墓志久負夙諾均須於春夏閒償之

書札卷七

三

### 致左季高

一浚川在南安小挫之後未接嗣音印渠一軍西來夾擊似不可緩浚川軍勢太單如有疏失所關非小印渠不願歸江西調遣卽請由湖南發餉調度若上游得手將來印渠由吉安袁州瑞州以達於潯湖與弟會合後諸事易商決不令印渠拂其本志置之於江西而不之省顧也千萬請其速出

一調兵四百亦不爲少兵之不甚中用弟久薄之非至今而變易前說也特以近日各處募勇者甚多應募者漸少卒之擇將



甚於將之擇卒朝秦夕楚輕去其主辛苦教練甫覺可用轉瞬已失其所在矣或在此營當散勇則貪易一營以充什長甫得什長又思易一營以充哨長若兵則壹列尺籍終身不改鄙意欲借兵呆板之風稍變勇浮動之習故發此議亦勸潤帥參用兵也至行裝決不可少南山可移此例難變彭山岷起行之時已囑其向湖南省庫借發在敵處協餉項下劃扣矣望速行之一婺源已克復敗賊歸併景德鎮必猛撲一二次凱章不知足禦之否二十八日之役老湘營死者二百餘人凱章屢挫而堅穩之氣不爲少撓誠不可及惟駐鎮已久而又爲賊截去歸路是其短處現囑其堅壁弗出致賊而無爲賊所致半月以後我

書札卷七

美

之戰舟可入賊之糧食漸缺或可得手未知其能堅持否

一筠仙 召對

聖意殷勤垂詢閣下將來自不免一出特世

變相尋而日多人材分布而日絀終恐趨於不支粵捻內擾嘆哦外伺非得忍辱負重之器數十人恐難挽回時局也

與左季高

朱唐兩將陰受迪菴之誠祇在弟側護衛不歸他人節制迪亦曾以此託弟自迪沒後朱唐持此議愈堅不然則早令赴凱章矣潤希雪三人俱囑弟早赴湖口此時蕭軍孤危弟未便置之不顧若印渠能至南安界則弟放心北行矣擬明日移駐撫州萬一景鎮疏失賊蹤內犯駐撫則可屏蔽建昌駐建則不能兼



顧撫州也卓見以爲何如

與陳季牧

來緘書法極妙字不滿四分而筆下有千里之勢廿年苦心孤詣今日始有成效可與天下共賞欽慰之至望更多作楷書僕有佳文數首將來求大筆書寫上石也

與李小泉

蕭軍在南嶺頗覺孤危僕在撫建尚可稍爲照料北行則彌隔絕矣景德鎮官軍萬一疏失賊蹤內犯撫州實當其衝保撫尚可兼顧建昌駐建則不能顧撫也報銷開局總以迅辦爲妙早一日有一日之益速一日省一日之費局用不可太嗇飲食須

書札卷七

毛

常豐潔從前辦數年苦糧台此際宜辦數月甘報銷僕賴雪琴釐金頗不窮矣一笑少荃自潯湖歸仍望速赴大營以慰馳系

覆胡宮保

接兩次惠緘并說帖一件敬聆一切所欲復者條列如左

一水師操習陸戰衝出下游亟肄以疲賊多方以誤賊此自勝算七年閣下曾上一疏與此亦大同小異四年黃麓西上一說帖在侍處亦大同小異國藩淺見竊以爲吏治有常者也可先立法而後求人兵事無常者也當先求人而後立法求人以統領爲最難營官亦頗不易得厚菴自三河大變後愴懷同志度其情態且如中鈞之魚失配之鳥勢難強其另關門面重立規



模雪琴亦久疲思息非復有朝氣可用縱強之使爲統領亦必不討好若於楊彭二公外別求統領之才不知陳金鼃劉國斌李成謀三人可統此席否若水師營官中不能挑出統陸兵之人而另擇一人納入水營誠如尊慮必不愜洽此陸軍坐船以求統領爲第一義之說也至抽勇三分之一以習陸戰恐楊彭及各營官哨官皆不甚願自廬州再陷巢湖水師好船好礮盡以資賊計亦必出江與楊彭決戰水師抽勇登岸固亦不可不慎鄙意抽撥水勇操習陸戰不過欲其熟舟楫彼此聯絡耳卻須准其另募槳手補足原額其船隻則須另行打造如極大舳板如渡船如長龍之無平盤者與賊舟相似而不用前此之師船或者人人樂從此段議論侍不寫信告楊彭恐先淆亂水營之耳目也

書札卷七

庚

一官揆帥欲奏調察哈馬千匹大凌河千匹采買千匹自是欲與侍原奏合符起見旋奉寄諭令斟酌採買不知又變議否侍建策時尚未悉官馬若是之不可恃也且待秀帥會尊處覆奏後再行酌定采買何必定北口陝甘去鄂稍近亦有可買否田興恕似可爲騎將已緘商季高兄矣

與胡宮保

正封緘聞楊名聲回營具述舍弟溫甫靈輓過黃荷蒙情文優渥行路感泣矧在骨肉悲感曷極臨風百叩以水師改充陸勇



而另募生手以補水營之額不用師船而另造渡船等式  
浩費於尊意變法之中微寓省費之道已覺相背然揆以水營  
近日之情態恐須如此乃克有濟若圖省費則可徑行裁撤水  
軍三四營全改陸軍亦猶可辦得到若必強其忽水忽陸是一  
是二則一舟之中有改陸有不改陸有加餉有不加餉勢必窒  
礙難通耳不兩聽而聽目不兩視而明兵勇愚蠢自須專習一  
途以壹其心志上岸殺賊洗足上船之說當築濡須塢時已知  
其不可行矣聊貢芻蕘以備采擇

致彭雪琴

一水師改習陸戰事僕昔年亦常持此論後思之亦多窒礙之

書札卷七

五

處今觀來示所陳多苦心體察之言然潤帥之志思欲出奇制  
勝亟肆以疲賊多方以誘賊若非從水軍設法則陸軍更不能  
出奇矣總求閣下與厚菴另生妙法於下游稍出奇兵則楚軍  
乃有生動之趣賊亦不敢壹意上犯

一舍弟溫甫忠骨業經尋得初三日自黃州還湘荷承格外關  
垂感激何極李秉苑所雇之姜姓望飭令無庸再覓

一普鎮一軍難令獨當一面僕前令其派二三營赴張凱章處  
助剿則可若令其出建德以攻景鎮之北則與凱章兩頭隔絕  
恐必誤事婺源克復江軍當可來鎮會剿養素前與張小浦先

三有約也



與邵位西

承大箸墓表自首至尾皆論弟奪情之事此似表弟之墓於先君子無涉弟以十二月接到時事與大篇中所陳各情多有不合先人葬地刻下正謀改卜可否敬求鴻文另纂一通增光泉壤垂示家牒幸切幸切張小浦中丞之事聖恩已許其守制特以主者未能宣廣仁化速擇替人致令進退兩難其汲汲求去亦自持之有故閣下所謂責之大義者不審云何考經典中言奪情事惟公羊傳較詳孔子以三年之喪而從其利微示諷戒則固未深許也後世奪情大約君固留之臣固辭之兩盡其道未有君以爲可去臣自請奪情者也近世官場丁憂率不回

書札卷七

早

籍或奏或咨畱營畱省自請奪情習爲常例鄙人不幸兩次奪情皆介乎可去可畱之間進退之際茫無依據至今惶愧軍事非權不威非勢不行弟處無權無勢之位常冒爭權爭勢之嫌年年依人頑鈍寡效惟冀一二有道君子錫之箴砭兼亮苦衷卽深夜冥行庶有見明之日若不揣其本而齊其末不知者棄之惟恐不速知我者復責之惟恐不周則歧路又歧將奚所適從也廿年摯愛聊一鳴白惟無棄其隘薄而更惠以法言感幸曷旣

與張小浦中丞

頃聞婺源克復具仰頌畫鴻謨無劾不摧此間景鎮之師迄未



得手養素兩獲勝仗士氣爲之一振若得仰仗聲威發賊遠遁  
鎮軍亦漸得手則可逐出江濱通力合作局勢較順蕭浚川於  
初三日克復南安府城爲之一慰惟南路賊數殊多或竄楚粵  
或畱江西均非易了之局深用焦灼聞尊處餉項近頗支絀尙  
足支持否

### 與王人樹

吳翔岡偶一小敗遽請撤散情詞迫切除夕退紮三十里不顧  
掣動大隊此二者翔岡之失也八月二十二萬年之役凱章有  
約不到臘月十九景鎮之役又有約不到此二者凱章之失也  
自意城與閣下南歸後僕於各軍聲息不甚通莫能判其曲直  
得失頃始略識其詳也故望閣下與意城速來通達眾情以期  
和協江西添餉三萬之說業已應允每月由河口釐局解一萬  
五千由省局解一萬五千又咨請敝處代招勇三千人以後辦  
事略可放手特統領之才難得雖添新營仍嫌散漫如閣下能  
來接辦營務恐次青又當出爲統領也

### 與沈幼丹

聞皖北之賊日來蠢動有上犯楚疆之意一股窺麻城一股犯  
蘄水胡中丞與李希菴已自黃州進禦蘄水惟麻城尙無勁旅  
足以當之不審楚疆果無他虞否景鎮之賊殊悍官兵亦夙稱  
精勁但得彼此和協上下一心終有破賊之理目下單薄之慮



猶淺攜貳之患較深大約利則相歡而日和鈍則相咎而日乖亦軍事之常態或者轉手得勢即可漸趨於和順乎

### 與彭雪琴

湖口一關經閣下與楊李苦戰而得自須力守勿懈或普或劉應擇三千人堅守此關其築壘挖濠均須閣下一經理不可稍疏亦非異人任也

### 覆胡宮保

雪琴寄不尊書知皖賊分道犯楚此固意中之事四眼狗果在何路非希菴之靜不足制之湖口一關經楊彭二李苦戰而得不可稍有疏失普劉二君若言進取則有未逮若深溝高壘以

書札卷七

望

守湖口或猶力所能支普軍助剿景鎮侍止調二三營者亦虞湖彭空虛也此處爲鄂中門戶亦爲楚軍所必爭尙望蓋慮時籌及侍已緘告雪琴囑其悉心經理其大處仍求鴻籌運度侍前一摺有未可卽曰北行之諭自當暫駐撫州待南贛之

清耳

### 與耆九峰中丞

建昌有兵五百又有王守新招之勇六百若益以元守之勇二千則兵力已厚但欠子藥頌蒙惠解敵處火藥二批業已到撫卽分撥萬劬往建則兩府皆有備矣普總兵之勇弟前分撥二三營赴景鎮助剿尙屬可行胡潤帥咨調全軍赴鎮則湖彭未



免空虛弟頃緘達潤帥及雪琴囑其力保湖口也尊意如以爲然卽求便中咨行普劉各營爲荷大約皖南之賊四面受逼則仍不免窺伺江西若江西於廣撫建三府湖口一縣皆以重兵扼守使賊屢伺而不得逞然後以江西之完力規復皖南則賊勢自爾窮蹙是否有當伏祈偉畫惠示

### 覆劉傑人

接稟牘知閣下欲辭差歸養現值彭湖之間警報迭至閣下門渥受國恩自不能遽行撤營湖口石鐘山爲江西兩湖扼要之區官兵屢年血戰乃能奪得者此次下游之賊上犯恐有窺伺湖口之意務祈閣下悉力扼守保全湖口或卽守彭澤以爲屏幃或另駐要隘以便防禦總使湖口萬無一失則閣下功在三省也國藩因南路喫重暫不能赴湖彭三月間卽可北來共事矣

### 覆左季高

一頃接人樹信言桂陽失守後興甯宜章又繼陷矣不知確否請飭院署承書將南路緊要軍情隨時咨明敝處戰船截湘江賊難西渡之說恐不可恃昔年江西之賊不能西渡贛江者以上下游皆有陸兵聯絡也若上下數百里無陸兵則處處可渡水師縱能梭巡一二百里得數百賊牽制之則不能兼顧他處矣此層尚煩熟籌



一湖南有事王人樹新招之七百人朱惟堂新招之五百人可由尊處截畱以剿湘中之賊計玉班在茶陵可與浚川之師聯爲一氣印渠峴莊在安仁衡州等處亦與蕭趙易通消息人樹則或在楚勇營或在湘勇營均甚相宜

一調營馬以練馬隊最爲要著此時勇興稍闌氣亦漸減不得不參用有缺之武官參用有籍之營兵以資維繫若借此以整頓營伍使有起色則百年之利也

### 覆郭意城

湖南此次之變出人意料之外去冬接和帥咨卽言翼逆石達開欲自茶陵竄入湖南敵處未甚以爲慮湘中亦不甚隄防此

書札卷七

四

賊前隊已破桂陽永興等處而後隊之在南安信豐者尙能屢挫蕭軍何其多也浚川解信豐圍後現飭其回駐吉安以援湖南計到吉當在三月初間入茶安等處則中旬矣鄙人無回湘之理且抑鬱已久心血積虧雖回亦無裨益若湘事危急凱鈐全軍亦當回援鄙人自知顧其大者急者必不擁以自全而自壯也第衡州向來未謀城守之計卽有勁旅回援不知來得及否張六琴來或畱大營或畱建郡均可奏辦近見吾黨氣誼相合者皆失之孱弱且處境多有不順亦未知其何故

### 與蕭浚川

此次賊犯湖南變出意外人心驚惶閣下救援桑梓以速爲妙



多發偵探能於中途截剿一二仗當更得勢弟在撫州於湖南賊情大相隔絕閣下稟商南中丞相機進止可也

### 覆胡宮保

吾鄉南路近日鼎沸桂陽宜章興甯永興四縣桂陽一州先後失守郴州隔絕不知信息衡州亦岌岌矣此間派蕭浚川由吉安橫出茶陵截擊不知來得及否又王人樹朱惟堂新募勇來此者亦截畱湘中助剿賊勢浩大誠恐杯水不足以救車薪早知如此待去冬當合蕭張併力南路不應合凱章圖景鎮也蓋一則見賊在閩浙奄奄若無能爲一則寸心思與閣下及希菴厚雪之師合勢爲二端者所誤耳若湖南果糜爛則江西湖北

書札卷七

墨

兩省將領士卒皆有反顧之志軍事益難措手而湘中餉源驟竭無論黔粵無所資藉本省卽已不支大局變遷迴出意料大奏以黃州爲老營尙未咨到正月所陳芻言以此條爲第一義幸蒙垂採羊瀛黃三清皆不能戰侍深知之趙福元聞頗能戰在鄂不甚關輕重在湘猶可助其兄也午橋內召直夫引疾孤我氣誼不勝感喟近來科場事株連太廣夷事辦理太柔均不甚愜人意常思一陳鄙愚而回顧在外數年百無一成言之滋愧甯默默也

### 覆彭雪琴

太湖荆橋兩處平安麻城蕲水亦尙無警景鎮相持如故惟湖



南局勢頓壞桂陽永興宜章興甯四縣相繼失守桂陽州亦陷  
郴衡俱岌岌駱帥令王人樹帶千八百人守衡不知趕得到否  
又不知新招之勇足恃否吾鄉兵將分布各省江鄂黔粵尤多  
一旦有事本省空虛全局震盪此閒派蕭浚川由吉安回援茶  
陵亦恐緩不濟急敵處添招三千餘人三月可以到齊合之護  
衛之三千凌蔭庭之千人尙屬可以一戰總須景鎮得手乃能  
再撥兵回援湘省耳

### 致官中堂

頃接鄂信得悉舍弟溫甫靈櫬過漢荷蒙枉駕親奠職卑望淺  
辱勞台旌下莅逝者有知泉臺亦應雨泣生者闔門銜感尤無

哭書札卷七

哭

旣極德帥還京江浦受降似金陵卽日可下蕪太亦有佳耗但  
求南北兩湖漢黃安謐衡永無驚大局仍可底定去秋聯句謂  
閣下身似歲星今茲危疑震撼之際其尙福我而壽我乎



